

兩浙輶軒續錄

兩浙輶軒續錄卷十九目

張廷濟 梁祖恩 陳希濂 趙日熙 陳鱣

錢 棫 朱 鬯 馮元曦 吳書城 朱文珮

張慶成 袁步先 吳 淵 施丹心 施應心

葉 燕 章 煒 蔣 珣 徐迪惠 王登庸

應曙霞 應 培 唐邦契 沈寶麟 陳夢桂

孫宗承 徐 瑩 李遇孫 顧廷綸 張泰初

胡馥堂 仇 林 朱人鳳 羅文鑑 徐友德

周士鈺 周 右 張迎煦 陸 潮 陳 甫

倪稻孫 姚 湘 孫元培 楊文藻 吳昂駒

高 錢 曹言純 徐錫可 丁子復 于 源

計 枏 黃慶澄 吳 修 胡光第 辜典韶

張千里

徐瀉本

朱紫貴

魏星杓

周昱

施惠心

陳詩香

陳詩裔

董承濂

董桂芳

胡子錠

潘一心

姚偁

朱金卿

何旦

唐聖贊

陳承然

施彬

賈應鴻

賈應程

鄭宗善

吳丹萼

陳遇春

張大鏞

陳棠

兩浙輶軒續錄卷十九

督學使者潘衍桐訂

張廷濟

字叔未，鎮子，嘉興人，嘉慶

戊午解元，著桂馨堂集

府志，廷濟少親炙海鹽吳懋政，學有根柢，領解後，屢

禮闈，遂結廬高隱，以圖書金石自娛，書法米南宮，草隸

獨出冠時，詩樸勁，與核晚年眉長，徑寸，與阮元合，摹眉

壽圖，泐石人，豔稱之，子慶榮，道光丙午，解元，有稻香樓

稟孫晉，雙廩膳生，以遭亂入忠義錄，冷廬雜識，叔未居新篁里，嗜奇好古，自商周以來，至近

代凡金石書畫刻削髹飾之屬，無不搜聚，搆清儀閣，藏

以詩各系，緝雅堂詩話，儀徵相國曾贈叔未眉壽圖，并記文一時

傳為韻事，叔未謝詩云：卅年重見上台星，帶艸叢叢綠

滿庭，弟子顏衰眉亦白，先生情重眼逾青，傾心學壽還

揚給相國有學壽齋，文見擊經室續集中，題黃文節公書新篁臂閣，竹高八寸二分，闊二寸四分

嘉慶辛酉從諸城相國所藏文節

書劉賓客伏波神祠詩墨蹟摹得

兩浙輶軒續錄

卷十九

張廷濟

一

L L L

誰鐫寒玉半規如兩字  
涪翁老筆餘有客臨摹須閣學此君  
擡舉自中書鐙前萬畫蠅頭細窗外千竿鳳尾疏爲喜嘉名  
符小里愛渠吾亦愛吾廬

袁永之北征圖

絹本橫卷高六寸七分長二尺五分陳道復畫前有祝京兆題北征二大字後

有祝京兆王雅宜文壽承彭寅父顧華玉錢貴湯子重湯子鳳陸芝王圖金元賓袁邦正袁尙之袁補之袁與之諸題詠嘉靖四年乙酉科袁永之妻領應天鄉薦第一此其入都時諸友人送行作也

匹馬胥臺賦北征旗亭楊柳故交情文章門第傾耆舊風雨  
河橋夢弟兄早歲應須成富貴傳人何必薄功名十年三上  
長安道愁聽陽關疊幾聲

嘉慶十三年六月十九日爲永甯元年甄壽歌

甄縱九寸五分

橫五寸厚一寸四分兩面俱有麻布文右側有花文左側入分書曰永甯元年六月十九日瀉于氏作奉氏立上側刻損下側有魚文

浮瓜削藕午置酒八瓠精舍爲甌壽甌降庚申漢永甯到今  
一千六百八十有九齡想當陶旗時定有精靈聚昆吾埏泥  
女媧團土太乙火吹雷公橐鼓寶氣上燭天重九六丁下視  
驚且走帝謂情于第一手有虞陶後無出右猶恐人閒當塗  
典午兵燹不耐久特付天吳揚侯靈胥海底守右文稽古逢  
熙朝龍堂奉出裏鮫綃老漁爛醉眠不穩怪底虹光生中宵  
知余有古癖掇贈古張宅至元嘉禾志履仁鄉  
管里五其二張宅石友爲賦詩  
宗工爲題額八瓠精舍扁中  
丞儀徵夫子書錦藉并香薰摩挲閱晨夕今日  
慶君覽揆辰爲君招邀致古賓建康太康元康咸和太和太  
元客俱至潘吳戴徐俞萬并及蜀師羅道人右古甌  
十四品龐眉皓  
首心貌古恍惚漢晉皆遺民吾家稱觴共甥姪村醪一杯甜  
如蜜重爲告曰甌兮甌兮君之生也金聲而玉質維魚年豐

夢大吉莫化為龍夜騰逸歲歲年年壽君六月十九日維願  
壽君之人各得君壽十之一

秦漢十二瓦當 文曰永受嘉福曰衛曰漢并天下曰甘  
林曰長生無極曰上林曰長生未央曰

長樂未央曰長樂千秋曰千秋  
萬歲曰永奉無疆曰億年無極

古月團樂十二回秦時宮闕漢時臺不隨明鏡融焦土翻共  
靈池話劫灰幾字印泥參聖節一輪銜璧誤瓊瑰贏顛劉蹶

尋常事輸與人閒作硯材

黃山鐙 高三寸八分上盤盛膏處高六分徑二寸八分  
下盤徑二寸四分柱痕三道純素無華篆文四

日黃山第三在下盤上面案漢書地理志右扶風槐  
里縣有黃山宮孝惠二年起三輔黃圖卷三黃山宮

在與平縣西三十里武  
帝微行西至黃山宮

槐里離宮久草菅金釭猶是記黃山形模雁足慚新樣點滴

龍膏認舊斑幾照挾書經火後 孝惠始除  
挾書律 偶隨片瓦出人閒

程敦秦漢瓦當文字俞短檠世事嘗應慣八尺高張只等閒  
筆修得黃山瓦於興平

阮儀徵師重摹石鼓以初本見畀用前韻言謝

儀徵宗工巨筆持敦士則古鉞袞奇謂姬周時獵碣十車攻  
馬同萬方治方今深簷與蓋覆一洗萬古羣言疑四方髦士  
難盡覩仰瞻

天上徒嗟咨爰開范本生面出四百餘字美粹斯杭州郡庠  
妥位置紹興經石聯肝脾刻成初墨先賚及下士感悚增歎  
噫研辨臨寫日不足但覺筆正無偏敬我讀先生等身著此  
特一節貞珉垂寰中摹古更無上得寶深喜如願私

陳仲魚同年過新篁里爲題其簡莊

萬疊青山萬樹華故園無恙舊隄沙一身許鄭譚經席幾葉  
韋平相國家且向篔簹維客權待攜琴鶴到官衙潞河歸日



眞如昨風雨黃昏未卸車

得漢銅弩機文曰河內工官第六十一丙郭牙臂懸刀  
兩鍵並同鑿款米粒大敲斜中有古趣五月廿三日  
集客小飲出此其看徐籀莊用梅都官飲劉原父家  
原父懷古錢勸酒詩韻作詩見投如韻答之

階樹肥欲滿庭華麤亦妍樂與儻蕩客伴我衰遲年盎盎酒  
泛雪颺颺茶炊烟將熱未熱候旣雨欲雨天喜乍古金獲漫  
作乘輦先何時戟出沙俾免珠沈淵漢京年不紀河內地乃  
傳想飭將作匠便習昆明船特鑄積弩印不虛水衡錢省括  
度則釋發鏃中必連法雖夾庾昧字卻銖黍圓我願洗兵甲  
其樂眾大千偶爾作文譙陶然皆天全何爲醉紅裙酣飲小  
嬋娟

十二月十九日爲蘇文忠壽適海昌蔣生沐光煦海鹽

張受之辛新募筮屐圖以墨拓索詩

重到彭山爲降崧可憐畢世挽強弓都因否泰關朝局豈止  
亨屯出命宮歸路未圓江北月靈祠已颯海南風一番歌笑  
一番哭天上人閒此壽公

峨嵋人出自堂堂射影徒工屢謗傷旗鼓何緣分洛朔門牆  
終古重秦黃八州民下干行淚七集詩傳一瓣香兜率海山  
皆福地知公身在白雲鄉

天容海色兩澄清父老迎看慶太平雁帛纔傳歸屬國蛇年  
何遽厄康成九重孰問前身事六合難包蓋代名石室文翁  
無恙否好留圖畫祀諸生

聽吹蔥葉返黎家吠怪何妨犬亦譁春雨不愁邨路滑帝城

猶記帽簷斜伯時墨妙碑雖蝕子固神傳視未窪正鶴南飛  
吹笛日海天開徧玉梅華

九月十三日秋榜發次兒慶榮領浙解回思嘉慶戊午

余領解之年八月十五夜半第三場卷畢與外甥徐

壽臧同柏學徒王孟將溥同歸寓情事成此詩與壽

臧時孟將已故

卅九年前事真如昨日曾爛銀街道月殘蠟號房鐙存歿昔  
多感科名今又仍所嗟同老大白髮兩鬢鬢壽臧今年七十二

梁祖恩

原名常字眉子號久竹錢塘人嘉慶戊午舉人官廣東始興知縣

東軒吟社同人小傳大令初宰江蘇宜興以不屑抗塵  
奔走遂棄官歸喜游山頗擅濟勝之具飢寒風雪皆所  
不顧文譙流連有終焉之志家人固  
強之出復官始興旋遘疾卒于官

莊芝階仲方

招集延慶道院席閒出示火澣布

吳山晚翠明煙嵐，鷓鴣飛坐客酒半酣。莊君手持一尺布，云此出自南海南火澗之名。見周史蜀客相贈，裝行擔投之，烈焰果不燼，但見煙氣浮青藍。須臾煤盡呈皓質，彌覺瑩潔光曇曇。傳觀四座詫奇絕，各舉故實紛詰詰。請徵舊聞賦新見，諸家之說我略諳。或云炎山晝夜火，中有白鼠毛毳毳，製以禹貢織皮法，是紡是績，堆筠籃。其理或然，可比似雪蛆銀蛙，冰中蠶。或云南方有火木，非檀非柘，非楛，柎削膚成絲，入機杼。吳中白苧同輕鬚，別有建昌石絨，號山巔巖罅，窮搜探，捶勻根葉區，經緯蕉紗藤絹，相形堪吁嗟。方產各有別，其物則一種，則三辨類。安遇杰公識疏名，那得野客談。世閒異物難悉數，管窺蠡測將毋慙。青鹽洗金魚，濯錦此理相制誰能參。莊君示此重致語，徧索題詠歸詩龕。狀物媿無獨異筆，吟成那

免來啣哈

題孫兩人 同元 春江話別圖

曉風楊柳弄絲絲正是春江泛櫂時  
綠酒依然前度客青山新入送行詩  
無多裝束書堪屢有限他鄉路易知  
處處畫眉聲不斷孤篷閒唱竹枝詞

莫笑先生首藋盤茫茫宦海太無端  
清閒祇合呼仙吏風味從來屬冷官  
載酒有人應問訊移家小住便團樂  
尋常桃李門前樹一遇春風定改觀

陳希濂

字秉衡號澱水錢塘人嘉慶戊午舉人著澱水草堂詩集八卷

杭郡詩續輯澱水工懋隸書與黃小松易最契教習期滿得縣令會將注選復游京師尋卒刊其詩者爲海昌

查揆蕭山

汪宗炎

瓜步道中

宿雨滋眾綠幽徑客獨往水鳥度隻影漁舟掠雙槳月痕乍  
隱見星點時搖蕩我憶劉隨州蕪城秋色上

題屠琴鳴耶溪漁隱圖

何處泛靈槎知君愛若耶溪通三十六開徧芟荷花漁父偶  
吹笛美人曾浣紗思之不可見隨意傍漁家

趙日熙

字緝之仁和人嘉慶戊午舉人官金華訓導

江行口號

攤飯纔過又夕曛懸天月色露三分猿嘯幾欲迷山樹鷗宿  
何知漾水雲途遠漁歌催郢客峰連野火走燕軍行行何處  
村前路欵乃聲微煙際聞

陳

鱣

字仲魚又字簡莊海甯諸生舉孝廉方正嘉慶戊午舉人著河莊詩草

海昌備志陳鱣少承其父許氏說文之學而兼宗北海鄭氏論語注孝經注六藝論皆采輯遺文並據本傳參

以諸書排次事實爲年紀嘉定錢氏大昕謂爲榮然有  
條咸可徵信好購藏宋元雕本書及近世罕見之本其  
舉孝廉方正也儀徵阮相國爲舉主手摹漢隸孝廉二  
字以顏其居并爲書士鄉堂額仲魚既沒遺書散佚相  
國爲刊續唐

書于粵東

段玉裁曰乾隆己酉至都門時邵二雲王懷祖皆在焉  
余之識仲魚也實因懷祖仲魚所爲孝經集鄭注論語

古訓六藝論拾遺鄭君年譜及對  
策諸編余既一雜誦歎其精覈

羊復禮曰先生書之已刊者續唐書七十卷蔣氏別下  
齋爲梓集孝經鄭注一卷六藝論一卷經籍跋文一卷

士鄉堂原刻有論語古訓十卷綴文六卷對策六卷亂  
雜之後胥陞榛莽詢之粵中故老續唐書亦鈔存者章

氏式訓堂叢書重刻經籍跋文對策兩種其未刊者如  
石經說六卷聲類拾存一卷坤蒼拾存一卷鄭君年紀

一卷詩集十卷兩漢金石記松硯齋隨筆各若干卷皆  
泯沒不復睹所纂說文正義竭數十年之心力一旦散

佚不知所歸尤爲痛惜其僅存者詩人攷三卷尙爲余  
家所弄恆言廣證六卷舊爲吳氏竹初山房所藏今亦

存亡  
莫卜

妝域詩 井序

妝域者蓋前代宮掖角勝之戲或以象牙爲之其形  
頂微隆下平而有鍼宛同豎笠刻鏤精巧旁鐫妝域  
二字下承以局昔堇浦杭先生嘗與沈欒城厲樊榭  
趙谷林意林諸君作妝域聯句詩余舊藏剔紅妝域  
雕鏤尤精旁刻大明嘉靖年造知爲前明果園廠物  
因爲之詩並邀免牀吳先生同作

雕漆宋最精元有張楊作

張成楊茂二家

明時果園廠所製亦不惡

何物小團圓握之類傅任背盜面則平腹厚外微薄黑質露  
朱顏梓材塗丹雘周遭盤花紋剔紅勝金錯明嘉靖年製楷  
書未剝落乍見莫能詳羣編費搜索千中舊事渺空鐘放誰  
著徵諸道古堂妝域名昭灼六子共聯吟各人矜奧博此惟  
漆雕成彼乃象齒鑿形製悉合符大小咸相若宮中角勝戲



其事非臆度永晝館娃聞鋪筵縱浪謔柔荑手自織皓腕力  
嫌弱用智圓而神蓄勢搏而躍向難定午鍼卓如立丁腳袖  
拂尙旋螺局收猶啄鶴踰越界鴻溝輸贏等六箒想當世宗  
朝陳后載屏雀戲錢擲四側餘技恣笑嚔形史拾遺記世宗朝陳皇后少與諸  
女戲錢擲昭儀諸位號貫魚分寵樂形史拾遺記注今史官  
錢四側彈指三百年款識幾捫摸往事失宮城前塵付冥漠  
華諸位留作典故傳補入景物略

偶從吳市購得宋淳祐臨安志六卷雖非全本然自來

著錄家多未見喜而有作寄槎客先生

輸錢吳市得書誇道是西施入館娃志爲施宋室江山存梗

概鄉邦風物見繁華關心志乘忘全佚屈指收藏又一家況

有會稽嘉泰本賞奇差足慰生涯

同時購得嘉泰會稽志

槎客先生招同人集湖舫卽席

閒攜尊酒上輕舟  
幽意何堪共狎鷗  
四海交情猶有客  
重湖煙景正宜秋  
山分黃葉歸吟卷  
水漾紅霞入畫樓  
好與風光流賞徧  
人閒何必更丹邱

自題續唐書後

唐祚延年六十餘  
舊名五代儘刪除  
河東自可共和比  
江左還應季漢如  
不羨子京添半臂  
漫教無黨注新書  
快哉此日翻成案  
多少清流怨氣舒

漢鏹斗歌

嘉慶十一年四月余至揚州宋君帥初爲余

徑一尺七寸腹深二寸足高三寸柄長一尺一寸重

今廣法二斤一兩柄下篆文一行云梁山銅元康二

季口率史作按鏹木禮器周官鬱人云和鬱鬯以實

鑊而陳之先鄭注以煮之鏹中停于祭前是單解爲

鏹用以煮物或謂之鏹斗說文云鏹斗似銚而無緣

聲史記索隱引埤蒼云鏹温器有柄斗似銚而無緣

集一切經音義引字林云鑊容一斗似銚無緣又引韻  
 斗自衛孟康曰刀斗以銅作鑊受一斗蓋鑊刀同聲擊  
 持行夜者曰刀斗今在熒陽庫中也蓋鑊刀同聲擊  
 用或作刁斗別字也趙希鵠洞天清祿集云刁斗有  
 足鑊斗無足其說亦非曰梁山銅者博古圖有元康  
 銷銘云梁山銅二斗銷元康元年造扶釋云梁山銅  
 者紀其貢金之地梁山漢初為孝王之封梁王依山  
 鼓鑄為國之富云云近張君芑堂金石契亦有漢元  
 康鑊斗銘云元康元年考工工賢友膳作府嗇夫建  
 護萬年般長當時主令長平右丞義省重一斤十四  
 兩凡卅六字兩行隸書其形制略同而官名不同耳  
 曰口率史作者周官大宰云九賦鄭注賦口率出泉  
 蓋當時佐史之名司造此器者率作術說文率下無  
 重文行部衛將衛也此行率聲此疑為古文衛而說  
 文所未收口率史之名亦可補百官志之缺乃作歌  
 之以紀之

歲在丙寅四月半渡江有客初登岸故人手持鑊斗來為我  
 購得置几案柄下有銘字一行元康二年紀西漢舊傳拓本  
 制略同元二之閒卻共貫憶昔孝宣推中興屢獲休徵歌復

且零羌要服無不庭工匠器械良可贊采貢梁山銅在鎔作  
成口率史籌算羽林分給兵三千壯士朝朝供炊爨一器由  
來用可兼行夜擊之還自扞想見霜飄月落時其聲每與饒  
歌亂流傳已閱二千年幾度星移并物換土色爛斑翠碧鋪  
篆文鬱律蛟蛇竄元康鏹與建光卮先後來歸滄海畔明時  
許同生太守嘗得漢建光卮爲六只之一金石頻年經眼多收藏堪以此爲冠時  
清不聞夜擊聲留與文房充雅玩倘逢好古有同心佳話應  
須添一段

新建唐三賢祠

祀劉公長卿顧  
公況白公居易

名賢祀典喜新修高誼還同谷水流古蹟讀書臺並峙春風  
原草句相投雲山未改三唐景詩卷長教千載留從此鄉邦  
增故事溪毛可薦約朋儔

錢

械字宜士號雲壽嘉與人嘉慶戊午舉人官武義教諭著敦本堂詩稿

未金衍宗曰雲壽嘗手摘諸經要義尤究心理學宗傳辛

仁廟西巡獻冊錄入  
巡幸盛典在鎮海閩父疾不待請歸人尤重之

江行舟中感賦

看山不厭奇愈奇看愈好江行四日四百里日日看山暢幽  
抱憶昔覃懷獻賦時長城嶺上一鞭馳馬前翠嶂迎千疊天  
半桃花見幾枝舊遊回首如昨日歲月蹉跎將半百勞勞鞍  
背復船脣忽漫錢江此行役養親不遑悲無窮銷磨壯志孤  
長風彼蒼賦命安可強惟當清白保厥躬攜書百卷作行李  
對此江山差足喜胸中塵垢一掃除點點白鷗拍波起

呈翁覃谿先生

海內傾心久龍門許一登雄文蘇玉局奇字李陽冰嗜古窮

千載觀心徹大乘，慇懃頻訪舊杖屨。幸今承

朱

鬯

字錫芬，號雪君，嘉興人。嘉慶戊午舉人，官西安教諭，著盈川小草。

石澗山房詩話同。年朱雪君廣文砥行，立名淹貫經史，爲文下筆千言，立就弱冠。受知於朱文正公，乾隆己酉以選拔入都。

廷試之日

上命題片時查卷得卷先呈

純皇

帝稱善，獲入選授天台教諭。戊午登賢書，移鐸西安督

課有方，兼任吏治撫軍。阮公奇其才，保舉縣令。乞養歸，教授後學，從游日眾。一時有朱門之目。平生著述甚富，惜家寒不克梓行。

### 題黃雲峯畫梅

金華山中鼓琴客，贈我此畫一十有七年。焚香拂硯坐相對，清風颯颯來几筵。老梅一樹破空出，屈鐵爲榦交連。蟠亂灑玉田，千點雪淨掃蒼嶺。三更煙平生愛讀和靖句，誅茆悔不孤山巔。衝風戴雪走京國，紙帳不得酣清眠。素衣化緇飽塵

土青甃冷擁來盈川官齋兩樹久枯聳我來稍復增清妍細  
著疎花如有訴獨抱瘦骨非乞憐畫中貌似詎神似詢其芳  
意初不傳碧苔被體作鱗甲正待成龍飛上天

江干晚眺

武林去親舍祇隔一宵程此夕錢塘泊又隨南雁征雲山太  
末郡烟雨闔閭城其在斜陽外迢迢千里情

馮元曦

字天衢號花橋嘉興人嘉慶戊午舉人著花橋詩鈔

遠香詩話公篤倫紀勇於趨義漢唐諸儒經說皆能通其意詩文一宗蘇氏嘗自定爲蘇橋集書法得趙董神髓

冬晚卽事

溪南溪北見霜痕蠟屐尋幽到遠邨紅樹斜環橋外寺白雲  
亂護竹間門荻蘆渚淺浮魚婢穉稔塍高長稻孫樵唱牛歌

歸去晚一輪斜月映林昏

題小長蘆畫卷

花影穆穆淡水光小長蘆畔認雲莊一聲秋思空江遂吹送

南塘隔院涼

吳書城

字擁萬嘉善人嘉慶戊午舉人官貴州貴東道

府志書城中書入軍機陸耶中補貴州遵義知府值大旱開倉平糶並諭殷富量力捐振治無飢黎擢貴東道兩署臬篆遇重獄必反覆再三以勞卒生平事親孝與諸弟歡好無間

射雕

日落邊城耀錦袍將軍射獵試烏號雕盤峭嶺千尋迴帛裂  
秋雲一箭高記取平蕪灑股血定知青塞失霜豪歸來解帶  
應酣飲猶有腥風出繡弮

朱文珮

原名孫垣字小珊海鹽人嘉慶戊午舉人官餘杭教諭著春華秋實齋詩集



縣志文苑幼聰慧方弱冠恭遇

南巡

召試二等兩荷

賞賚考充功臣館膳錄書成選江蘇主簿不就授餘杭教諭捐修學宮書院士咸感之善篆隸蘭竹山水尤極精妙

甲戌春虹舫弟分校禮闈余以迴避不獲與試虹舫在

闈中倩孫少蘭侍御繪荆花隔院圖誌歉並集其事

五人感系以詩郵余索和作此卻寄

春風春雨負連牀羨煞看花紫陌忙  
鏤院敲詩紅翦燭特分清夢到池塘

郵筒珍重抵瑤華爛漫描摹及第花  
咫尺蓬山真不遠頭銜都署列仙家

公門移植錦成叢除了繁華逐夢空  
多少落花春不管轉憐宋玉在牆東

做盡長安季子裘新詩千里慰離愁  
春闈六度私堪喜光範

門無一字留

張慶成

原名慶盛字嵩三號秋樵平湖人嘉慶戊午舉人官直隸深州知州著秋樵詩鈔

縣志慶成以大挑授望都知縣調署南宮一以濟民爲心凡有利於民者無所不興旋率萬全創建書院俾寒峻肄業其中萬全文風遂爲宣府冠性至孝父病侍湯藥衣不解帶日不交睫者累月後侍母疾母素不信醫慶成禱神請以身代首頓地額爲之腫居父母喪日夜哀號鄰里聞之皆爲流涕道光甲午題

旌孝子

山莊幽居

敢詡東山高尙心未妨壯歲臥山林放懷痛飲陶潛酒遣興閒調阮籍琴秋雨梧桐闌外影春風楊柳水邊陰從今會得烟霞趣名勝何須著屐尋

袁步先

字天墀號東嶠平湖人嘉慶戊午舉人官盛京金縣知縣著循陔吟草

雅堂日記東嶠同年側儻負異才晚試尹甘州日夕思親貧不果歸終以太夫人計至哀痛沒於官讀循陔吟

草可以諒其志矣

滇南藩署後樂軒小飲和方伯百菊溪先生韻

座接天垣第一層四山佳氣望中增已教康樂書堪上還恐瘡痍俗未登絕大文章金篋字最清風骨玉壺冰樽前得句皆民隱忠愛如公見豈曾

吳

淵原名應保字和甫安吉人嘉慶戊午舉人

縣志淵鄉舉時年未弱冠數試禮部不售絕意仕進肆力於詩古文辭司教海鹽九年溫良清潔諸生莫不稱頌歸家杜門不出惟以文章詩酒自娛二十年如一日城市不識其面

喟遇贈施五應心

秋風何時來坐持搖落權明月自太古乃復有缺圓難保者榮名難留者盛年與君同意氣憶自十載前文章落吾手珠玉紛聯翩塞北詠折柳江南歌采蓮漢魏及六代沿波討其

源經術頗潤飾古義相摩研易陋輔嗣注禮補康成箋身世  
既坐誤憂患來交纏挾策隨上計風塵走連連等身書未成  
奚囊空一肩神仙與富貴失計兩棄捐俯仰成悲咤造物意  
豈偏伯子事苦吟謂亡兄膏火徒自煎孟公就郡職謂白折

腰學回旋惟爾同寂寞尙得空山眠中夜自循省頓解心旌  
縣如魚與熊掌二者難求全亮哉窮與達賢否不與焉甯以  
七尺身翻爭士女妍文辭起揚馬至行希淵騫得心無厭倦  
努力貴精專戮戮天目山茗水深洄沿書此當息壤矢志期  
同堅君才十倍僕他日容執鞭

施丹心

字集孟號性田孝豐人嘉慶戊午舉人著紅杏溪樓文集學古軒詩鈔

西圩族譜丹心受知於座師蔣丹林先生與從弟應心同榜祖璞山弱冠以諸生有名於浙爲盧敬甫魯秋陸諸耆宿所推重父菊莊清曠廣頤明敏過人爲孝豐施氏清遠堂中羣從十餘子之冠構精室蒔菊以諸子學

業故尤隆師儒喜賓客老宿時流菊區中  
曲廊圍洞之間坐恆滿丹心其長子也

簇蠶辭擬王建索諸弟同作

紅嬾思青嬾思舍南舍北攀桑枝灼山看火喚不止  
拚擋辛苦蠶花時繚娘催促光陰速喧闐打點花格竹中央  
四角堆鱗鱗防鼠防蠅料理頻小姑開箔拍手笑合羅串  
五白於銀年來上甲舞八卦況復長官減苛派完襦髻弱  
喜裝縣父老快家家羅拜陳椒漿衣被賴汝馬鳴王

村居觀穫稻者得三十韻

平疇嘉稻熟落葉曉霜嚴拋得庚辛鍤腰來戊己鏹趨收多  
稼遍旨穫眾謀僉達旦丁男警通工亞旅兼颶颶風力勁淡  
淡日光暹早爨移行竈秋傭出短檐貓同田祖迓魚想大人  
占節序從寅餞涵濡自夙霑種原殊黑柜岸或倚蒼蒹樹藝

神推稷權與帝號炎播琴傳素女仆鼓記蘇髯粒共虞狼戾  
禾非畏鼠黏實惟堅且好銚正利而鈿地本膏腴擅時方刈  
穫詹凝眸堆穉極樂業喜嚶嚶穗待惇惇拾聲憑札札添相  
偕聞程程那數秀漸漸襪忙應久倉箱報未廉曾孫功有  
慶寡婦利無厭作息甯辭苦和甘不受疴嵐猶環北郭晷欲  
下西崦斂罷霞成綺歸來月啟匳菑畚閒耒耜歌詠發閭閻  
打點豚蹄賽殷勤虎掌拈戴星春野碓炊玉映蘆簾五里馨  
香遠三餘況味恬烝成雲子飯佐以水精鹽處處紅蓮美家  
家白墮甜會當傾碧甕聊與認青帘矧屆躋堂祝爲春敢滯  
淹

施應心

字倩瓌號辛蘿孝豐人嘉慶  
戊午舉人著紅杏山房集

陳斌序略施子居萬山中十五六卽能詩平昔居遊閩  
見勃萃奇古一掃外人菜盪平蕪之習專寂十年學幾

丙斤酋子賣家

卷十九

施丹心

施應心

古

大成當交吳蘅皋輯翁晉樂府凡有散文遺策尋搜原  
闕歸其一家既縱游京師接大江南北之才賢博覽雄  
顧故其爲詩才情四發駿愉夷宕兼長  
極能悍然與蘅皋之攻苦必傳者並出  
定香亭筆談辛蘿尤致力于漢魏六朝之學以  
近體作饒歌橫吹諸題舊錦新裁甚爲奪目

知夢庵展先舍人墓

并序

七世祖松庵公明崇禎年中書舍人棄官歸結茆郭  
家鴨口去西圩村居三里而近署曰知夢庵營生墻  
於後山之麓甲申後臥疾庵中不復出題詩庵壁有  
投足小園聊當宅傷心故國獨登樓之句鼎革之會  
匿影深山著書終老屬續之夕焚棄無餘其落落大  
節當世曾無知之者郡邑之志亦闕焉丙辰春展墓  
畢家大人綜述高曾緒言命小子應心卽事賦詩愴  
然興懷輒成短句

連岡賊烈阜宿莽被荒隧上有千年室下有隱居寺先德安  
可忘神理邈焉遂勝國社未屋中原鼎已沸含笑虎溪度甘  
情鳳池棄挽歌洵達生梵住卽定慧芸葉淨藏壁松花香滿  
地濯足倡高言掉頭見深意鬱鬱青楓林幽人此長寐浮雲  
薄西山展拜一灑淚

上之回

萬乘向回中蕭關野燒紅樓臺望行月笳鼓警邊風西極來  
天馬前軍拂彗虹甘泉故宮在落葉滿秋空

將進酒

終日勸君醉良工未可觀江河杯酌盡天地酒人寬對月金  
尊滿圍風繡幕寒放歌心所作得意且爲歡

石留



流黃搗錦石石上水曾經南浦春波綠西洲蓮子青寒沙明  
遠渚涼雨散繁星載酒何人過蘭橈不暫停

隴頭水

隴頭流水去天涯隴上征人苦憶家寒雁自憐蘇屬國驕驄  
不戀李輕車秦川萬里開冰彩嶺樹千年著雪花嗚咽數聲  
驚別夢朔風何處動清笳

洛陽道

長秋寒夜幾聞鐘大道春光處處濃遙憶層城見楊柳相看  
雙闕似芙蓉龍銜寶帳三千所鳳卸珠簾十二重蕩子更工  
蘇合彈五花驄馬好游從

紫騮馬

黃雲海樹隱邊笳滿路烽煙滿磧沙老去秋風移苜蓿羞看

夜月映桃花獨棲聊謝紅梁燕共飲難將白鼻駒錦作連錢珠作絡馳歸應是日初斜

葉

燕

字載之又字再紫號次庵又號白湖

慈谿人嘉慶戊午舉人候選教諭

谿上詩輯白湖天分既高學殖

更富其詩縱橫磊落骨勁氣豪

秦瀛曰白湖之詩各體具備嘗言詩本乎性情如水之

生於天忽爲呂梁之險激忽爲江漢之安流其所出者

同故能湯湯而不竭若出之無本斷港絕流漸至於海

必不可得白湖之言如是是則白湖之所以爲詩也

緝雅堂詩話再紫詠鳥詩云不信黃昏猶自去

難窮碧落只相思用意沈鬱非泛作詠物詩也

高母岑安人往來天台多蓄古藤杖作此與菊蔭求之

家母六十八步履殊苦艱久聞天台山藤杖滑且堅路遠莫致之何以慰慈顏高堂並庚子歲能上其巔奉佛信有神扶

行亦輕便勢如蛟虬僵色作琥珀殷還聞蓄其餘定欲廣結

緣亦知有緣人近在咫尺閒願分福地光共作地行仙再拜

請上聞布施佛所先

古意

秋風颯然來高閣枕遙想美人在何許顏色難仿攬衣起  
徘徊蟲聲雜松響棲禽靜不翻殘月寒初上壞壁挂枯桐不  
爲無人賞

章慙尹秋濠出示懷弟詩自傷憔悴乃以做鄉荒陋比  
之東坡僂耳豈所謂詩必窮而後工乎然詩工矣做  
鄉之冤嗜其甚也因戲拈此贈之

我鄉枕山海物產非一族其民事耕耘雞豚亦家畜以故洩  
茲土往往贖口腹使君江南來牛女紀同宿縱少異語言甯  
憂隔嗜慾胡爲懷惠連儼似墮荒服當年兩蘇公萬里遭斥  
逐蜜唧朝畏餐鴝鷄夜聞哭此鄉豈云然咳嘲太脫俗從來

名士瘦有竹可無肉不然錢神慳終朝煮茗粥先生自清癯  
何可罪邦域詩人好言窮土風宜實錄佳句定流傳敝邑受  
詬辱爲君參轉語官瘠民乃沃

倦夜

閤閣蛙號野蕭蕭雨過庭亂雲吞月黑孤影逼鐙青花向檐  
前落人從夢裏經隔牆聞鼓瑟空爾泣湘靈

登東渡門樓

鄴城突兀枕飛流鐵鎖長虹日夜浮山影遠牽殘照落濤聲  
高接海門秋殊方艦舶爭寬禁舊日風煙入倚樓鼉作鯨吞  
無復見東南形勝控明州

章

煒

字孔與會稽人嘉慶戊午舉人官秀水訓導

山東道上見拾麥有感

景風掠地黃雲積來牟穉稔滿阡陌婦大小逐隊行偃僕  
畦閒同拾麥或如編菅操或如秉秆獲或貯之囊囊或挾之  
肘腋不分此界與彼疆鎮日取攜情自適主人在旁渾不噴  
腰鎌草草紛狼籍汗牛驅驢忙持歸餘糧棄之曾不惜世俗  
嗜利多徇私計較錙銖結錢癖索逋每恐有漏卮振貧未肯  
捐一溢有時蹴爾與乞人簞食豆羹珍如璧視此鄒魯拾麥  
風慨然使我懷先德遺秉滯穗周雅歌寡婦利之資朝夕豐  
岐讓畔神感孚仁被黎蒸共惠澤今茲夏畦慶麥秋拋擲餘  
粒任拑撫因知王道固非迂革薄還淳無今昔

雁字

拈毫奮迅勢無停鳥篆參差宛象形書練影涵秋水白題箋  
樣借曉雲青技工起草樓蘭渚格擅飛花繞荻汀鴻戲天然

留妙本未知許否換黃庭

數行摹寫自成家人字平分一字斜飛白文高痕映雪草元  
蹟古篆留沙疾揮風雨休說乙亂點煙雲欲誤鴉陣陣書空  
偏有序聯珠詩集儘堪誇

一蔣

珣

字少泉餘姚人嘉慶戊午順天舉人官瑞安教諭

家傳畧珣志不在詩初則欲爲當世有用之材而久困於科場繼乃專闢聖賢立教之旨而深安於時命卽詩而論性情遭遇亦大畧可見矣著易詩書春秋義無忘錄濱海圖說三徑堂詩文稿許正綬曰君與予同師羅近齋夫子而年齒前後懸殊品行方潔鄉黨所重簪書甚多尤見根柢

北行寫心

總髮抱孤念此已非常身慈母沈哀疾亦知當乖分服勤盡  
歲月閒居離世紛一形似有制聊爲隴畝民

徐迪惠

字鹿苑上虞人嘉慶戊午舉人官江西泰和知縣著象洞山房文詩稿

馬賡良撰墓表先生究心青囊天玉諸書神而能明嘗  
與青田進士端木國瑚訂正地理元文一書道光初  
巡撫資道來京與選三吉地敘勞擢同知先生既雅以  
地理自喜故歷宰劇邑廉明慈惠而一時譁稱先生之  
地理吏績轉隱焉

姚元之序畧鹿苑通天文之學凡天官占驗遁甲諸書  
靡不洞悉精微其爲文肆力於古彌強離奇精神迸躍  
不名一體君植品既醇而所學又足以輔  
之故能下慰民望爲他日傳循吏者所取  
許乃普曰鹿苑循吏也歷宰劇邑政平訟理與民安  
樂詩文亦春容大雅所謂仁義之人其言藹如歟

登快閣

在泰邑係黃山谷舊跡

憶昔曾聞快閣名我來新構乍經營時方新葺萬峯拔地青

遙送一水橫天綠倒迎風雨不磨文字迹江山同寫古今情

但能了卻公家事儼學黃公倚晚晴黃山谷詩云寢兒了卻公家事快閣東西倚晚晴

王登墉

字東湖上虞人嘉慶戊午舉人

上虞詩集東湖生有異稟學

問該博詩古文哀然成集

覃邨婦絕命辭

辭年水旱為夫婦從其夫乞食江上義不忍辱而死惜傳者不能詳其姓氏

朝發九龍山夕抵浦陽瀨人生異苦樂偃蹇斯為最天道有  
沴祥適與屨運會亦能安困頓復此事顛沛百年終別離所  
悲非老大與君始結髮及此已三載感君意纏絲生死相負  
戴君幸獲朝餐餘者尙分餽白骨沙磧場往往勞寤寐中道  
見棄捐沈痛空自懟念君正少年時清儻可邁征途重寇勉  
側足愁失墜而妾竟何為蒙恥苟求媚十年深自藏邂逅通  
警欬冠蓋交馳聞矧乃非吾類生無補於君徒以重君累舜  
江日滔滔中有英皇淚是君還鄉路是妾委身地自古重名  
義去去復何言君但歸湖西不負平生恩臨江酌卮酒可以  
致精魂死者如有知從君下覃邨



橫山春曉

坐愛橫山好春光入戶庭寒林明積雪幽澗淡疏星天遠空

江碧煙來小市青半窗留曙色有客倚松扃

應曙霞

字東一號梧垞永康人嘉慶戊午舉人官甘肅固原州著蔚思堂詩草

胡鳳丹曰梧垞生平好學耄年不倦道光乙未同潘雲軍功擢秦州直隸州知州著孝傳勤學記童史女史女小學蔚思堂駢文

烏闌莫侖河

烏闌莫侖河水出雪山阿

大雪山卽入寶山高出雲表四時積雪

山中十日雨

河水不盈科六月日當午飛滿下急弩瀾浼失兩岸老蛟逐

浪舞塞草衰河水伏內外界一瀆寄言素諾木慎勿過河牧

素諾木蒙古佳牧河外通來覬餽內地偷入放牧

黑林口

在大通口外卽蒙古佳牧

勁草入林枯邊闕一寒孤無風塵瀰漫未暮日模胡青海魚  
龍靜青海卽西海也在黑林口西北紅崖虎豹驅只今烽火  
息大樹掛雕弧

過漢飛將軍李廣墓

在秦州石馬坪

飛將五分上郡符蕭關心膽落匈奴石麟今日埋苔蘚鐵馬  
當年畏鏃鏢氣奪落鵬千騎逸精開伏虎一軍呼古來不少  
封侯骨曾見參天墓柏無

應

培字雨香清安人嘉慶戊午舉人官遂昌教諭

次孫湘帆新秋旅述韻

人海萍蓬少定居十年蹤跡笑何如無從乞米貪臨帖但得  
棲枝懶上書陶令定移彭澤菊杜陵最憶錦江魚思歸不易  
尋歸計悔向春明策蹇驢

兩折齋軒續錄

卷十九

應培 唐邦契 沈寶麟

子

唐邦契

字書雲壽昌人嘉慶戊午舉人官江西彭澤知縣

遊雲霞寺

地偏省塵事客館滿青苔彭澤一尊在東山雙屐開花深邀鳥至茶熟待僧來何必思津要官閒養不才

沈寶麟

字緞齋嘉興人嘉慶戊午順天舉人官湯溪教諭著雙琴齋詩

錢泰吉撰行狀君年十八舉京兆在湯溪借邑土修灑掃職而後必周視有漏痕輒新之藏書殘缺借鈔購補

文廟

祀事考武生葉某爲富家枉訟郡縣凡七檄卒不禱

廩生某病狂父得錢於待廩者請給頂不可因請叱之曰利乃能移人父子情乎必不可某疾亦廖縣令欲增賦勸止之所刻湯溪節婦譜孝子譜施衣集存信錄勸設社倉議減釀備荒說皆可師法歿後湯邑士爲君位

於報本祠

粵西雜體詩

陡河船著水利也陡三十有三本稱靈渠秦所鑿甚淺隘舟行必設槌瀦水尾而進柳州一帶爲

西陸河

東山西山雲繞麓南谿北谿瀑穿谷中有一河曲復曲泥盤  
盤石确确戢戢魚魚萬舸舳箇堅葦柔汨汨其流十夫築牖  
百夫扶舟朝鋤頭暮門限馬頭山在河則色長在眼朝青石暮  
黃泥並陡名馬頭山下猿狖嘯其崎嶇也若此乃自蠶叢開闢  
之代始不見渭河西上通斜衷石湍枉費萬人勞不見離確  
一川概千畝荷鍤成羣謠蜀守休論一千七百渠請看三十  
有三陡

千里馬

記嶺驛也徑不容騎募善走者  
供往來文書役謂之千里馬

山重重水窅窅城郭環空亭堠小上有一綫走千盤鹿挺熊  
經捷於鳥借問道旁戴笠兒十步九仆將安之云是千里馬  
追風不假駒踪蹶朝馳桂州夕邕管畏我簡書不敢緩不見

兩浙齋軒續錄

卷十九

沈寶麟

三

八八上

關山無極風雪寒壯士豈知行路難

拜年獠

美循化也歲首獠來賀長官獻鵲雀之屬官酬以酒食泗城諸郡有之

松作蓋蘆作吹獠人來賀長官歲手中何所將谿毛一束山禽雙叶口中何所祝春雨秋暘百穀熟昔時不知官易見今日喜看長官面昔時只說畏柳杻今日公庭饗春酒官來獠不知官去獠人思願官如水亦如鏡不諳獠言諳獠性

跳歌女

志俚俗也春仲邨人聚兒女唱和擇婿謂之跳歌諧者有贈新嫁娘必張繖往設三日

東家有郎髮如沐西家有女蛾黛綠兩銀釧小緊纏臂百褶囊長不蔽足郎嬌女慧來何遲梳榔花底歌一曲不歌園中柳不歌陌上桑只歌一片相思江扁舟欲往天一方窳修來時不下牀阿爺炮豕弟割羊紅巾翠珥結歡愛妾唱郎愁兩不肯郎莫作手中罌涇渭不分明妾莫作頭上織陰晴一轉

眼

伏波鼓

存古蹟也銅鼓漢伏波將軍以鑄馬式故鮮存者今巡撫署有亭貯其一

青銅出土苔繡環千鈞一鼓持獻官云是狸獠昔日之所鑄金釵一叩張百筵自從將軍驅馬來嚴關鎔銅造式櫛裝還蛟龍半缺不可識只今存此靈光蹟寒空突兀城東亭夜啟魚鑰鳴鼉更隆隆不似千年聲四山風雨飛鳶鷺君不見伏波寺古蒲牢齧此物由來勝偃月

柳州碑

述異聞也碑文曰龍城柳神所守驅厲鬼出七首福四民制九醜其首一字已缺後書唐元和十三年柳宗元字多漫蝕明天啟二年始得之相傳渡洞庭者搨一紙焚之風濤河息

客從龍城來貽我一片碣字青石赤驚仙靈藏之千年不磨滅碑幅徑尺文二九厥詞維何述神柳殃鬼福民制九醜誰其作者羅池侯珠玉棄擲何年收洞庭十二之飛樓下遣六

丁人閒求翠旗偃蹇來中流焚碑上見飛燭浮神光離合蛟  
鯉愁祥颺送艫千里游吁嗟乎誠能通神豈文字一占中孚  
再既濟

祭榕祠

戒虛禱也榕在平樂郡有三皆大數十圍高數十仞蔭可半頃或以神祠之

南有木兮離之濱根在土石柯在雲春容百斛納空腹蕭森  
萬笏陰無垠此樹不知何歲有焚香叩額皆稱神越人好巫  
競禱祀嗟爾焉測元精理白鵠下來鷓雞鳴時有灝氣中流  
行超然榮槁都忘情安用婆娑來乞靈榕兮榕兮爾生一何  
適不受人閒斤與尺匠石輪扁惜不得何似泰山之松華山  
柏

種藥戶

閩瘠產也地產藥種艱取數弗給於用利遂農桑矣

黃茅瘴過升蘭泉手中一握靈山苗谿乾石瘦泥力薄種之

十稔乃一穫越南桂實由來稀千歲茯苓偶得之離披山漆  
賤於草日刈繁莖忽焉少松閒種藥人空還雲深莫往鋤蒼  
山我有一言語守土不見零陵石鍾乳

行淮楚間觀蒔秧作

東邨打麥西蒔秧南諭令正農課忙一春靈樹不停滴猶聞  
屏水鳴鼓鐸

土人以  
和田歌

下田已潤高田乾天公降澤費等量淮

南楚北穀再熟天下以之爲饑穰井田難復遺意在畫區多  
以斜準方百里一川限地勢慣潏積雨爲陂塘千溝萬澮羅  
其閒潢汗行潦皆天漿乃知水土稼穡本消息實挈五行綱  
十年讀書坐何事農田水利百未詳濫明藜糝亦民蠹慚汝  
力作吾難償欣遭

釀化屢大有蔗蔞雖苦娛倉箱停輿一笑破飢色家家餅飢



開籠香

陳夢桂

字耐庵石門人嘉慶戊午順天舉人

詠史

爭桑一哭動闕闕重寄何堪屬腐儒從古書生多白面更無  
兒子號黃鬚軍門巧進蒲萄酒蓮幕私堆薏苡珠椰葉榕花  
三百樹秋風多半入單于

孫宗承

字亦升號蘇門歸安貢生仁和籍嘉慶戊午順天鄉試以年例賜舉人已巳會試以年例

賜國子監司業著菱湖紀事詩蘇門山人詩集

府志宗承從厲鸚鵡杭世駁游指授詩文稱為東園五子

章丈斗光過浦述及端人從祖殂謝並將赴霞江歸復  
之從兄樞感懷

南浦秋風一夜寒老成彫謝泣無端青山冷落新詩卷白髮

蕭疏舊史官四海論交紛感激九泉不作益悲酸託孤更有  
新安守添得禾田與藥闌

舊事淒涼不可論三年死別痛難言逢春猶憶西堂夢剪紙  
空招杜老魂文社論交能舉義瘴江埋骨早銜恩他時會葬  
濠波裏寒食花開酌一尊

徐

瑩字青苕桐鄉人嘉慶戊  
午副貢著北遊小草

曉發吳江

曙色侵蓬背雞聲唱月殘煙波入語隔江寺曉鐘寒淚灑襟  
猶溼書成達亦難垂虹橋在望風滿蓼花灘

李遇孫

字慶伯號金瀾嘉興人嘉慶戊午  
優貢官處州府訓導著芝省齋集

遠香詩話廣文幼承祖訓淹貫經術著隸古釋文爲說  
經者傳述晚年秉鐸枯蒼撰括蒼金石志考證極詳  
秦瀛曰金瀾博學多聞著述宏富大概見百歲翁小印  
詩武康徐雪廬稱其詩原本家學一唱三歎多澄淡之

音

余生乾隆乙酉今爲道光己亥逾絳老二歲矣下數至  
上元甲子爲百歲因鐫上元甲子百歲翁小印繫以

詩

生年七十五氣候交隆冬下數廿五年上元甲子逢磨石製  
一印豫稱百歲翁或乃大嗤笑白首愈愚憊茫茫古聖軌渺  
渺神仙蹤嗟爾欲致此有何德與功曰唯唯否否汝焉知乃  
公人生號百年豈真百年終假令果得之百苦瘁其躬雙瞳  
秋水光霧障昏濛濛有耳竅亦塞莫或司吾聰齒落食不下  
髮脫頭斯童腰腳付羸頓態狀笑疲癯寄命赤藤杖絕迹青  
芙蓉對人成厭物撫己渺歡悰夫豈不曉此謬欲求之豐顧  
我有至樂譬彼食蓼蟲恐汝昧厥旨爲汝剖其衷平生愛讀

書到老無倦容丹鉛滴璀璨圖史排玲瓏著述雖不富一

接殘叢少時識奇字隸古專研攻尙書隸古定釋文八卷金石性所嗜

碑錄潛研宗芝省齋碑錄八卷仿潛研堂跋尾北宋石經考杭萬待彌縫董

充宗兩先生考甚略因補之更著金石學姓氏羅心胸金石學錄四卷皆講金石者竭

來栝蒼山搗徧雲間峯栝蒼金石志十二卷磨崖居其半日知錄補正閩顧

期交通補正一卷校正二卷并校正蜀潛邱補正及校正喪服翼註金石緣起隨筆尙考覈欲

發前人蒙芝省齋隨筆六卷拾遺文苑古古文苑拾遺十卷補孫觀察所未備徵事天

香濃天香錦八卷述同里前軌鶴徵佐搜討前後詞科同香子輯前後鶴徵錄余佐之成

古文聊具體辭達氣尙充芝省齋古文十卷詩多性靈作冰雪聲縱

縱曩時編八卷好友刊粵東芝省齋吟稿八卷海昌應君誦蓮刻今存四百篇

未必皆菲葑喘息仍苟延種種思磨礧妄冀千秋業定此百

歲中區區若余畀其樂也融融縱使大限到亦不怨蒼穹造

物故狡獪不識違與從作詩通問訊付與扶搖風

題商寶意太考質園詩集後

詞臣乞郡儘風流到處題詩徧酒樓惱煞秦淮來又去不教  
常作寓公留

七字纏縣組織工鍾情多在此編中一生精力消磨處前有

環娘後小東

顧廷綸

字鄭薌會稽人嘉慶戊午優貢官武康訓導著玉筍山房詩文稿

家傳略通六籍過目成誦絕倫博覽

定香亭筆談余在紹興作焚香夜坐詩蓋別有所託也次日以此題試士餘姚吳大本云一簾花影不宜夢半

榻鬢絲閒似禪顧延綸云絳帳卽今聞

陶潛宣曰君初以詩受知于阮文達公商周二首及漢

印數四詩皆文達命作尤所激賞而君學問淵達不僅

釋史學管窺諸書

茗花

碧乳輕陰白玉泉此花開向小春先碾成飛雪偏宜月占斷  
秋風欲化煙小朵儘教青鳳啄細香消受素濤煎阿儂肝膈  
清涼甚沾爾餘芳使醉眠

焚香夜坐

宵分何事下疏簾愛護濃薰故故添絳帳卽今聞眾妙幽齋  
誰與識清嚴閒依榻枕看茶鼎自撥爐灰數漏籤萬籟無聲  
人悄悄半窗明月映棋奩

商虎卣

上作虎形子作父戊尊彝蓋器各六  
字古器銘作虎形取服猛之義也

仙椿榮大年積算如積古甲子啟臺臺疊疊漉醇醪選器仍  
十三其卣一曰虎於禮爲中尊厥制甚華嫵通高尺二寸口  
徑五寸許夔紋繞饗饗科斗篆响嘯橢梁環陸離犧首蝕青

土燄眩凸金目粲粲蟠銀縷摩挲蓋器銘六字森可覩曰父  
戊尊彝子作義何主子實有商姓考古得所據叶或云象執  
戈堂構紹庭戶質家以幹名戊次正居五或云是吉日諏筮  
類庚午不知古銘器流傳誌某甫虎彝翠媯尊黃目姬宗酌  
茲卣實兼之璀璨寶簋簠文炳應天樞色中符地數止暴禮  
或然服猛義則取觥觥中丞師韜略備文武寅引簇羣生丙  
炳明前矩釀化軼劉昆宋均蕭露湛灑潯風冽與雲屬其應  
捷桴鼓二月夾鐘律椿庭列仙聚禮飲設三爵監史示童殺  
綸愚愧籍湜未解尙功譜上壽先奉觴拜手稽首舞鞠脛晉  
金玉肄雅頌枸枳平格嗣商賢眉壽保純魯舉卣銘吉金永  
言受天祐

周亞卣

銘作亞形中父辛二字  
字畫平漫異於他器

積古列周器其一爲亞卣形亞體本殊同敝例須剖或云兩  
己背於義究無取其實爲兩弓相戾分左右古人工畫繪黼  
黻形皆偶斧藻與黼弼取象固不苟茲卣實主之銘義得八  
九父辛字平漫摩挲斗沫部量高尺一寸觚棱銳環鈕酉文  
象提梁腹徑許容斗圓勻土花紫繡黼夔紋厚惟辛實紀年  
於周定誰某宣王平淮夷征伐殲羣醜錫命釐圭瓚臣虎拜  
稽首其年爲乙亥用辛義則否重耳錫命時其年實己丑策  
命晉侯伯亦復書己酉或者取先甲更新論終狃書終文侯  
命定策擁宜曰紀元首辛未卣或仇所有懋賞用酬庸弓矢  
命同守是以古銘器示武重桓起茲卣本中尊厥象類盈缶  
義或通繡裳禮可速諸舅其形雖陸離其量實虛受金壘黃  
目閒舉此晉春酒椿喬蔭貞梓孫枝逾萬畝春秋八千歲此



貞同不朽錫鬯待銘勳入覲瞻我

后還以

天子恩奉爲堂上壽

漢劉勝印

文曰劉勝私印四字勝字白文按前後漢劉勝有三一見前漢書景帝子中山靖王一見後漢書和帝長子平原懷王又

後漢書杜密傳劉勝潁川人

棣鄂風寒枝葉弱黃金斗大鑄成錯叢羽折軸口鑲金中山  
一印人間落漢家骨肉誰最親當筵絲竹增哀辛高帝子孫  
盡龍種相待不若尋常人不若尋常不足責謀臣設算無遺  
策但願堯符衍萬傳區區削土臣何惜吁嗟乎一尺布尙可  
縫一斗粟尙可舂屠沽繒販繫侯印煮豆泣釜誰相容儒者  
考古識遺事此印摩挲不能置一涕眞回天子顏千秋留得  
藩王字炎綱垂滅火井然金刀剛卯重復延君不見平原蚤

死季林老空悲腐草羞寒蟬

漢永吉甌

隸書五字曰永吉宜侯王漢人好以吉祥語銘器如鏡洗之類甌文亦然

八甌敞吟館賓從羣刻燭傳觀永吉甌待補明誠錄人生萬事圖吉祥此甌文曰宜侯王子孫千億仰昌熾紆拖金紫生榮光油然古質色深黝甌陶定出西京手古人作器盡能銘五字嘉禎期永守漢家宮闕遙相望前有未央後建章延年長樂誌丹篆勒名千載期稱良藩封五等重侯伯兵衛門庭森列戟簪紱曾傳萬石家門閭首擴于公宅吾師中丞淮南公祥和之氣天所鍾摩挲古璧辨文字與古運璧將毋同禁垣昔日常簪筆花甌日煖詞頭吉五鳳黃龍雖紀年兩字吉祥此第一

題姚允在畫仙山樓閣圖

瓊樓十二紅闌干蓬萊水淺生微瀾  
不捲凝曉寒彈指雲煙麗金碧  
輒風吹放星榆白芙蓉城闕  
仙官居廣寒宮殿嫦娥宅月地雲階宛轉通銅鑲魚鑰啟玲瓏  
青鳥掌書鶴守戶下界但見雲濛濛虹橋影落黃姑渡銀浦  
無聲瀉珠露玉笙一曲隔花聽天雞叫醒扶桑樹偶從瀛海  
泛枯槎知是仙山第幾家松陰滿地無人到但有雙鬢掃落花

張泰初

字安甫號松溪錢塘歲貢著游仙詩

姚若序略松谿張子著古樂府一卷勞容與哀美女含怨

陳文述曰松谿此册出入漢魏置之茂倚解題不讓古人

杭郡詩三輯松溪兼工倚聲有兩浙詞輯又著武穆外傳頗精

馬頭孃神絃曲

一歌作蠶絲再歌白紵詞一歌再歌神來嬉一歌祀蠶姑再  
歌當窗織一歌再歌神之德東鄰西舍來蠶孃紅顏綠鬢嬌  
新妝柔桑影裏春風香白粥泛膏換羅綺彷彿靈旗展花底  
歌以樂神願神喜願蠶常作同功繭終日相隨情宛轉願蠶  
莫作寡女絃商音欲絕空相憐神絃調急喧晴晝五色六章  
願神佑衣被天下垂無窮敬告絲人并蠶母

石流

石上水流載清載濁濁不可汗清可浴石不可轉水流何太  
速無東無西或南或北一往不復白石巉巉自孤獨

來日大難

來日大難風塵迷漫今日相樂置酒讀曲一解卮酒沾脣惟恐  
不醇聽曲喜新惟恐不真二解湯湯流水一瞬千里挹者常留

注者不已

三解

有舟有楫言渡關河關河縣邈憂思孔多

四解

楊

兮柳兮青不久兮柳兮楊兮短復長兮

五解

長相思久離別明

月圓愁再缺缺時容易圓時難長歌短歌未闌來日又作

當時看

六解

胡馥堂

字綠野一字禧伯號晏生

杭郡詩續輯晏生詩筆清雋石琢堂韻  
玉朱雲陸鴻主講紫陽書院最所欣賞

寄懷秋泉湘雨

春色真孤負情懷百感侵大江孤客夢明月故人心知己難

爲別相思直到今小庭叉手立愁與落花深

一別真成悔鄉心路幾盤家貧分手易夢短到家難夜雨黎

花落春陰柳絮寒明湖回首望遠道隔漫漫

度台嶺

小徑盤雲上蒼茫海色微危岬愁過鳥斜照戀征衣斷坂深  
溪水人家短竹扉仙源微棹到聞竹更依依

仇

林號又村錢塘廩生  
著壽竹山房詩草

新市夜發

西山雨初歇涼月滿船頭犬吠知村近蟲鳴助客愁挂帆風  
力勁搖夢櫂枝柔明日寒山寺題詩憶舊游

西溪道中

平生游興劇一棹到西溪山帶斜陽遠橋隨野艇低竹風空  
外響蘆雪望中迷曲折不知處惟聞幽鳥嘯

朱人鳳

原名王字謂卿號閑泉錢  
塘廩生著祖硯堂集十卷

杭郡詩續輯閑泉詩先借其兄棧有同岑詩選之刻祖  
硯堂集乃其暮年刻于粵中者也後附畫舫齋詞二卷  
梁紹王曰閑泉爲青湖先生之子工詩善畫久因場屋  
幕遊粵東其詩警鍊超拔卓然可傳五言如露雪云日

冷難爭色山明不受煙湖上寓樓云波光沈小艇  
壓春愁七言如邗上舟中遣懷云吟情似水初分派  
歸夢如雲欲渡江落葉云平野盡消無賴綠夕陽都  
作可憐紅城南寓齋云樹因驅暑生風葉蟬已知秋  
怕雨聲皆琅然

可誦

緝雅堂詩話謂卿集中有題翠屏洲雜咏二十首爲王  
柳村豫作柳村品詣高潔嘗舉孝廉方正不就阮文達  
公與之交契曾輯江蘇詩徵一百八十三卷文達爲策  
閣于焦山海西庵姚文僖公題日詩徵閣今閣已傾圮  
惟額尙存儻有風雅之士爲之脩築亦韻事也

詠物二首應阮芸臺夫子教

宋宣和內府所藏琥珀松鼠筆筒

孤根屈曲蟠虬松有鼠騰踔松林中雕鏤意態何玲瓏云是  
宣和琥珀筒粹質晶瑩色如血千載松脂土中結想當採取  
貢天家琢自良工貯不律宣和天子善畫鷹揮毫逸氣猶憑  
陵草間狐兔盡擊走黠鼠那得懸枯藤經營花石喧闐闐朱

勸蔡京皆鼠輩北狩羈縲五國城此筒流轉風塵內案上摩  
挲帶古香出來雅玩當珍藏珊瑚筆格堪爲伴還憶陵中烏  
玉箱

元延祐二年艾虎銅書鎮

頑銅百鍊精英聚躍出紅鑪化爲虎艾葉紛披徧繞身踞案  
張牙若含怒形模約略半尺強逼人猛氣非尋常辟邪取象  
中天節魑魅能教走且僵攜來位置牙籤畔頓覺高齋增壯  
觀壽山文石不足珍宣德糝金未堪換既能鎮惡兼鎮書不  
獨山窗充雅玩從來舊物少流傳土花斑剝凝蒼煙細觀知  
是元時物延祐留題第二年

冷泉亭坐月

明月如故人到山若相識愛茲林壑閒迴與塵境隔流泉通



雲根涓涓漱石脈水光交月光倒射潭底  
白夜靜生峭寒憑闌清露滴茲遊不易  
逢聊以永今夕

吳山觀潮兼送遠梅時庵遊金華

秋放萬山青潮來一綫橫浪花低越嶠  
樹杪走江聲不盡登臨感還增離別情  
金華洞天好相送去帆輕

送陳新筮歸黃山

黃山奇秀處三十六芙蓉未識君歸去  
高居第幾峰閒騎幽湖鹿靜聽隔林鐘  
何日來相訪同看六代松

聞李光甫北行作此送之

河梁忽聽唱驪歌一片孤帆逐遠波  
鴻雁南來君北去不知何處稻粱多

瓜步不得遊翠屏洲寄王柳村

春滿翠屏洲。春江花影浮。東風三月暮。愁共去帆流。之子耽高臥。頻年招遠遊。相思不相見。援棹獨夷猶。

丙寅七月有假。予原名壬。致書巡城御史吳公者。公以

書入

告奉

旨下北寺勘問。閱兩月餘。其事始白。賦此志痛。

貫索星高命。若何陡然平地駭。風波有生意。向圓扉託舉。世誰憐。冤獄多漫聽。蒼蠅工點紙。虛將白璧恨。填河翼。逢照膽。秦庭鏡一認。妍媸便不訛。

茫茫浩劫本前因。肝膽居然誤此身。不信薄遊逢路鬼。無端法網到詩人。范滂有母增悲痛。張儉離家劇苦辛。此夕故園刀尺夢。但知獻賦踏京塵。

羅文鑑

字秋堅錢塘增生  
著聽彝軒詩存

府志文鑑性至孝色養庭闈晨昏無間父病躬親湯藥  
衣不解帶者四閱月父歿葬南屏山麓味爽必攜竹帚  
藤楹詣墓堂掃落葉薦時果依戀移時始歸治事雖風  
雨寒暑不少間少受詩法于瑣墉一以王孟為宗中年  
變而學宋體格清道在振綺堂詩社中足張一軍別著  
讀書隨筆四卷清波續志若干卷皆綴于兵燹世無傳  
本

理安道中

羣峰曲折宛相迎  
雨洗螺鬟分外明  
出峽泉聲聽遠近  
熟梅天氣幻陰晴  
綠雲一鴈采茶去  
紅日半山叱犢行  
桐帽櫻鞵堪入畫  
者番領取十分清

徐友德

字備五號石橋錢塘增生

曉發桃源嶺

一徑入叢碧  
籃輿得得行  
嶺高殘月落  
村遠亂雞鳴  
竹露沾

衣溼松風拂面輕我來盤鳥道山色望中橫

周士鈺

字天石錢塘諸生官安徽  
盱眙知縣著菜根香集

陳留縣訪蔡中郎故里

楓葉停車處霜風捲地來中郎留故里過客有餘哀史絕千秋筆琴焦太古材傷心郟鳴日吾意獨憐才

淮上喜逢友人

公路浦前秋水生淮陰臺上霜月明當門帆落客初到入座  
鐙燒杯再傾卷裏江山留好句胷中冰槩戀虛聲十年舊雨  
深宵話容易人間唱渭城

周

右字保之錢塘諸生官江蘇  
東臺知縣著奇蘆詩鈔

許仁杰曰保之有凡案才怡軍書可倚馬待以功得七  
品秩宰東臺多善政邑有勝國遺老王石袍先生讀書  
負大志

國朝累徵不起講學以濂洛爲宗保之訪其裔得遺書捐

傳刊之其志  
尙可想矣

滕王閣

秋水白無際眾山青欲來登臨還弔古慷慨孰憐才鳥與孤  
雲遠帆隨落日開憑闌懷帝子漁笛有餘哀

滎陽道中

極目成臯舊戰場人隨嘶馬入蒼茫千家樹色浮秋郭萬古  
河流捲夕陽虎柙雄關深樹擁鴻臺衰草故宮荒我來多少  
登臨感不盡愁心滿大梁

張迎煦

字柳谷號晴崖仁和貢生官湖南  
永州理徭同知著秋紅館詩集

丁丙曰晴崖從尊甫香濤中書佐兩粵吉制府幕隨勦  
粵逆苗事平敘勞授訓導嘉慶九年山東鐵撫軍保

賜名

熙朝雅頌集以山東省刻工不佳交浙江巡撫阮元於

杭州校刊時晴崖乘鐸孝豐徵司監刻集凡一百三十  
四卷閱四月工竣旋陞慈谿教諭所著尙有棧谿耆舊

端江舟晚

據關首虜遲來庭角吹樓船去不停  
秣謁晴波搖夕照  
貔貅小隊列津亭  
村村榕蔭濃垂綠  
朵朵蓮峰遠送青  
醉倚吳鉤一長嘯  
魚龍驚起晚風腥

丁未春日將歸里門賦別楚中諸友

黷然自覺百無能  
且學吾宗老季鷹  
皮相可憐成蹙叟  
頭銜又復署龔丞  
豈真樗櫟偏多壽  
未必參苓盡有憑  
算到不如歸去好  
鄉心先已過吳興

陸

潮字秋江仁和貢生著秋江詩鈔

杭郡詩三輯秋江少時手一書必成誦始釋好詩經日以注疏置案上摘其疑義爲文學昌黎說經宗漢學學使者竇諸城朱文正試經解輒冠通省著有周易尙書毛詩諸經說

湯鎮雜詩

吾鄉東臯東濱海苦斥鹵江葦久蔓滋人煙罕鳩聚何爲鹽  
事急官書集旁午緬惟蘇長公於此理治譜鑿河督干夫役  
興催曉鼓溝坑旣泥淖况值瀟瀟雨誰能恤農耕詎識公心  
苦迢迢七百年漸次闢桑土春蠶散繭香秋田慶多稔時有  
誦讀聲金石出衡宇河水綠盈塘興到曳柔艣臨風企前修  
蒼然一懷古

陳

甫

字瀛芝仁  
和廩生

丁立誠曰旣儀徵督學浙中以受生雲伯及瀛芝爲錢塘三陳後瀛芝與雲伯游京師都人又合荔峰侍郎嵩慶爲浙江三陳時譽交推如此嘉慶丙辰嘗徵孝廉方正固辭不就

仿宋畫院製團扇歌

南宋冰紈北宋遺草蟲沒骨花折枝澄光綬綬出機素一規

璧月明秋輝漢宮春深已無色霞綃霧縠風煙蝕宣和沿及  
渡江來待詔諸公有遺式當日河陽擅寫生馬家一角筆尤  
精紅梅貌出宮紈豔留得楊家妹子名舊迹收藏藥特健半  
是明宮半元汴檀栢筠邊仿製工春羅重翦團樂而當年障  
面是何人今日臨風更寫真凭君擎出懷中月還是錢塘舊  
日春

倪稻孫

字穀民號米樓一繫孫印元  
子仁和增生著夢隱庵詩鈔

北隅掌錄稻孫十齡以河伯觀海賦受知于學使朱珪  
補諸生工隸篆尤擅倚聲吳錫麒序其翦雲樓詞蘆中  
秋瑟譜甚

亟賞之

羣雅集米樓本姓凌爲忠介後  
人詞宗白石與郭頻伽齊名

荆南旅次

十載風塵際於今悔壯游支離憐弱息辛苦到荊州雲水三



生夢千戈滿地愁放懷無處好出郭看江流

再宿了角驛

迢遞還鄉路因循第一程況當風雨夜都是別離情斷岸涼  
蛩語空槽瘦馬鳴妖氛從此靖楚境已休兵

秋雨連宵有懷同社諸子

重陽節後雨漫漫紅燭清尊向夜闌別院風聲摧木落連宵  
蛩語報秋殘茶毘舊事傳鐙下醉白新吟走筆端更憶工書  
松雪子黃昏孤館不禁寒

姚

湘字實田仁  
和附貢

王同日寶田居塘棲嘉慶十年道光三年浙西大水創  
議給振罔不獲所災後多疫自製珍藥以療撫部儀徵  
阮公黃梅帥公  
推爲鉅德長者

鄴水土物五詠

雪藕滴珠液甘芳和心脾前身玉人臂滑膩如凝脂一歌玲

瓏曲再歌白雪詞

藕粉

一點鑄秋煙離離綻朱實中有歲寒心雋味奪崖蜜無核不

須懷拜賜長者席

蜜橘

綠葉已成陰枝頭孕梅子浸以昔昔鹽餘酸澱人齒妙技縷

成絲相思亦如此

青梅

蠟家好兄弟白者人稱良珍逾白玉白勝他黃金黃子重墮

枝頭山雨聲浪浪

枇杷

小林貢甘蔗記之潛氏書登場舞竿木到老味有餘似竹堅

多節惜哉心未虛

甘蔗

孫元培

字賓華仁和附貢仁

楊振鏞曰賓華爲古雲龔伯之弟受業彭甘亭之門爲註小謨鶴山館集行世又從高爽泉學書得褚文忠筆

意

碧雲寺和費曉樓

丹旭

羨爾扶筇去重尋  
煨芋緣山深留古雪  
雲靜伴臞禪畫意塔  
依水詩心月在天  
故人相憶否茶話隔年年

登滇南城樓

危樓嶮嶽倚晴空  
俯視封疆氣象雄  
山勢直盤南詔去  
水流倒注北溟中  
金城草木秋煙碧  
玉斧關河夕照紅  
一笑竟來身毒國  
三乘何處問唐蒙

楊文蓀

字芸士海甯歲貢  
著述鄭齋詩鈔

許莊祥曰芸士丈爲惕庵裕龜兩先生介弟學問淵博  
與兄頴頴吾鄉有三鳳之目好收藏圖書尤嗜說文中  
年素筆遊江左道光末先府君觀察擢儲儲聘丈入幕以  
柔梓之誼敦賓主之權公暇相與摩挲金石攷訂小學  
丈談論娓娓夜漏三下無倦容時年六十餘矣僑寓吳  
會不數年卒著

國朝古文叢鈔評選

精確世稱善本

河隄

河流雄萬馬河隄險一簣築隄豈無防原爲不虞備下流苟  
勿塞胡由致崩潰治河無買讓爭以下策試清淮弱如綫濁  
河日奔恣淤沙積百丈海口塞弗治河身高于隄帆檣迴雲  
際蟻穴儻一決驚濤注平地治病不察脈橫裂適爲累嗟哉  
神禹功疏鑿豈小智

紫雲洞

空青孰擘碎腹裂下疑井峭聳驚鬼工竅窾異人境短筇力  
安恃步踖不敢猛石縫陰颯吹颼颼入肌冷圓穴耿微光一  
綫透巖頂翻訝造化力有意示奇警虛房滴乳泉佇聽心亦  
靜輾轉出幽竇驚魂夢初醒

兩折晴軒續錄

卷十九

楊文藻

三

同蔣蔣邨炯遊西溪

夙願慕西溪茲遊出意外  
同心得蔣詡杉艇喜共載  
緩櫂緣溪流岸曲繞如帶  
十里無行人水竹互向背  
遠翠時飛來隨雲共明晦  
魚鳥亦習靜忘機自相對  
漸入彌覺佳輞川境疑在  
意愜已忘歸興劇幸無礙  
去舟尙遲遲暮山忽掩曖

陳曼生

鴻壽

招同人集第一樓分韻得鳥字

尋幽踐宿諾理楫及清曉  
隔浦聞漁歌客來狎鷗鳥  
同心得數子登樓豁襟抱  
林霏淡成煙山容靜逾悄  
百五風日佳斯遊覺彌好  
歸櫂故遲遲鐘聲隔雲表

上王述庵先生

當時小謫賦從征戎幕曾隨萬里行  
磨盾千言朝草檄飛書一紙夜徵兵  
金沙鐵壁移師地雅雨黎風作客情  
動業于今

樂天壤更教絕域震威名

鄭學齋中萬卷儲精研秘籍總膏腴禮詳郊禘宗高密易辨  
著爻祖上虞任筆沈詩當代重鷺湖鹿洞眾材趨問奇擬載  
元亭酒可許侯芭侍座隅

吳昂駒

字千仲海甯歲貢  
箸竹初山房詩草

吳衡照曰兄詩清曠諧適標舉

性靈喜藏書警校殆無虛日  
吳敦曰先世父詩辦香初白嘗搜輯初白詩見於他書  
者得一百首錄爲敬業堂外集與馮柳東教授輯竹垞

外集同  
一用意

述懷

任教落葉滿庭隈不遣奚童爲掃開性拙怕逢生客至囊空  
愁見異書來偶思直節庭移竹欲締寒盟手種梅一室行吟  
聊自得肯從歧路作迂迴

偕友人西村看桃花

嬌鶯宛轉聲不斷，春色三分強過半。  
客來相約同嬉游，閒踏西村綠楊岸。  
平橋曲徑何幽偏，盈盈碧水浮寒煙。  
無數紅桃傍溪立，似含薄醉顏醺然。  
別有素葩分玉圃，淡冶不隨紅粉伍。  
便邀穠李結爲鄰，一片雲容冷芳塢。  
忽傳清磬流梵宮，花影零亂迷碧茸。  
祇恐雨急花狼藉，還將晴霽期天公。  
屈指快游能幾度，況是桃源絕勝處。  
漫依暝絕返吟筇，遙聽鳴榔漁父去。

高

鉞

字秋原，海甯嚴貢。箸引流小榭吟草。

應時良序略秋原於書無不窺發爲文章沈博絕麗餘事作詩近樊榭一派

雜詩

天子優強項，將軍有揖客。  
人生天地閒，所重在骨格。  
綱常與

名教賴此作扶掖惡圓次山論阿諛子陵斥強直不可撓兀  
然表雄伯勢家折足几卑諂卒何益風骨恃嶙峋權貴可辟  
易干將逞剛鋒缺折又奚惜不見宋趙鼎吉陽遭淪謫抗表  
無貶損倔強終猶昔

寄得

寄得浮生一草廬孤燈兀兀夜窗虛十年辛苦蠅鑽紙半寸  
熬殘鼠寶瓊脈望何心貪食字毛錐無用媿成書春來百甕  
新醅釀儘許元文覆有餘余輯有覽古類證諸史蒙拾續通鑑  
摺華四子書翼義并著水窗雜  
說等書及古文尺牘共如干卷

曹言純

字絲贊號古香又號種水  
嘉興歲貢著徵賢堂集

甘泉鄉人稿先生自言先人有藏書少即徧覽及先人  
下世以債通負盡失之然手纂之册已嘗撮其精英矣  
其後時從友人借未見書且稍稍購置每得一書必手  
自采輯密行細書日可萬字閱五十年積成數積余每



宋史 卷之九 三

過從時時取閱若讀水經注詩則親見其纂輯撰著者也先生平生博觀約取力學以昌其詩大都如此小匏庵詩話先生刻苦勵學十七史暨各種叢書名人詩文集摘擷菁英饜飲之家故貧妻女篝燈夜紡手一編分光硯北掌錄口哦無虛夕有剛節水經注本前後貫串最有法工詩畫善倚聲仿江文通雜體詠唐宋各大家品藻藝林胸有積軸

### 題花南老屋

重畫春風舊釣磯藥畦花町已全非南鄰父老猶能記紅板

橋東白板扉

### 郭頻伽病起懷人圖

客裏無人共酒卮藥囊題罷復題詩一年幾日關門住轉憶

匡牀臥病時

### 宋砌街磚歌為葛廣文星垣作

銘文凡八字曰人豐翁集市井駢闐後一行云大宋

政和三年癸巳歲前又一行云大宋嘉泰元年辛酉  
歲正月十六用石重砌其陰刻秀州嘉興縣郭五鄉  
居住會首胡公佐張世隆精嚴寺靜悟大師有肱張  
安言羅明之馬悅沈奭費元實陳璋吳洪徧募眾緣  
同力重砌大市官街一道自韭溪橋東砌至菩薩橋  
聖宋政和三年六月十一日下手興工發砌伏願保  
國安民風調雨順仍願捨錢僧俗施主洎普天之下  
一切有情增延壽算植福無疆者書此謹記泥水都

料邵宗仁弟宗義等崇信書

政和癸巳修街磚嘉泰辛酉發石重非銘非記僅八字意賅  
語樸書體工其陰文辭祝史類禱求甘雨祈和風願延福算  
徧僧俗務在閭巷人好公集街由來七百載此地翕合稱人

豐鄉名歲久逸莫考安得建置推所從至今駢闐市井象通  
闌朝夕喧杵春葛君築街嗣先志倡率仁里相鳩工韭溪橋  
道接試院石匱啟視莓苔封時維六月日十一正與前事興  
功同陰德自謂如耳鳴殆已默感神明通濡揚持贈索賦詠  
翠螺丸墨香溶溶我思汴京夢華錄街巷無復尋磚筒武林  
舊事考諸市句闌瓦子迷西東銅駝荆棘兩寂寞北狩南渡  
再數窮良獄既作礮石散御題并碎卿雲峯紀年一字葬陵  
骨更鬱義士孤憤胸磚乎豈解抱遺痛付汝泉淚嗾秋蟲摩  
挲喜共馬券論瘦似跋尾黃涪翁昆陵嬾版銘句就宜州家  
乘載筆終蘇黃手蹟不可得此書已足當時雄惜無好事東  
觀老不腐瓦證羽陽宮他時留待補志乘竊擬志小資談叢  
一鏡雙鎖君不取經箱自畏怯篋攻月波樓前買醉好青錢

與我輸酒傭

傳旁又有一鏡  
兩鎖青錢等物

題阮中丞所作靈隱書藏

龍宮藏經處樓閣高嵯峨中丞改書藏指揮成刹那欲使山  
靈守永保著述科大庇寒士心倍勝廣廈多絡繹捆載至紉  
帙填層阿卻似梵貝葉白馬西域馱作者名山志率隨東逝  
波徒遭覆瓿用俗眼資笑呵史書志經籍老思終研摩其亡  
難可考其存有闕訛庶積石室卷千劫經不磨住持戒扇鏘  
擅出嚴撓訶事同香山老送集投祇陀寶函緘象軸錦籤織  
鳳梭茲焉華嚴海文字流江河暇日曝書會賓從盛玉珂杪  
櫛樹底陰廣宴長筵羅鏗鏘金石響和答留高歌我參玉版  
師翠榜瞻文螺汗青期無日白頭傷如何

徐錫可

字子申號可叔嘉興  
歲貢著小蓬壺集

柯折齋汗漬錄

卷十九

曹言純

徐錫可

望

府志錫可研究經史不爲世俗之學工篆刻詩  
筆亦古健黃院長安濤引爲忘年交唱和成集  
緝雅堂詩話可叔先居碧螺灣風景最勝嘗有句云  
雨過輕扶竹日斜初賣魚村居之樂令人歎想無盡

八月二十四日黃霽青丈招集息耕草堂同汪兩人學

博能肅張叔未解元廷濟章雲巖司馬光祖

木樨香裏泛流霞雅集山堂賞物華入坐正如圖五客

是日主人

出示禹鴻臚所繪五客圖爲陳午亭相國王阮參禪還與證  
亭徐健庵兩尚書王幼華給諫汪蛟門比部也  
三車時主人方摹刻趙松雪書法華經殘本情怡石墨餘非好老託林泉興轉

賒星聚倘教占百里少微也附太邱家

勵學一首示同學兩弟

窮理在讀書大道無涯涘文章貴爾雅經籍探元始嬉荒昔  
賢懲毋曰姑舍是三年不窺園聞諸漢董氏我宗食舊德一  
經傳孫子嗟余生不辰早歲失怙恃賦性蠢且頑得彼或忘

此終藉師友資幸得少倍鄙幾年舌本耕芸人病舍己愧非  
玉樹枝妄令謝公喜下榻忽見招羣季樂子起夏日舒以長  
明窗兼淨几展卷一再誦清風沁牙齒工夫在靜專學業戒  
遷徙此心無鴻鵠乃克進乎技弟兄本二難助哉濟其美不  
見蠹書魚終歲蝕故紙忽逢神仙字脈望化可企

丁子復

號小鶴嘉興貢生著  
見堂詩文鈔四卷

府志子復古文得歸震川家法兼工詩肆力于古學有  
本源海昌查氏重修新舊唐書時沈氏炳震原撰安祿  
山傳已佚撫仿補之  
兼任校勘尤多駁正

銀河篇

秋河伴月案戶牖蒼龍掉尾連箕斗白雲飛盡夜未曉金波  
無聲瀉空杳仙查徑渡水清淺癡牛服箱車輪轉白練橫斜  
冷不收宵寒織室機聲秋靈誰飛來濡兩翼鉤星耿耿秋繩

直機槍掃落推寒芒西流向曙迴清光烏雲一抹起銀浦灑  
作承平洗兵雨

曝書亭

先生著錄八萬卷六十歸來贖一亭大布衣徵修信史小長  
蘆僻考遺經菱池秋冷風前樹蘭砌春荒雨後庭垞北垞南  
娛老處讀書還照舊鐙青

贈惲子居

敬

卽今治行更誰匹岷強一官於物慈精力神明黃霸傳華星  
秋月次山詩讀書不落宋元習走筆直追秦漢師此日蒼生  
急霖雨臚懼浙水再來時

許兵部

宗彥

招賞牡丹

愛將花事課幽居門外招邀到小車池館一叢朝雨後亭林

三月綠陰初飛觴滿酌新篔酒列坐傳觀近著書倒載歸來  
君莫笑客愁贏得此消除

于

源字辛伯秀水貢生  
著一粟廬詩稿

竹南筆乘辛伯工詩與孫次山融交尤摯名亦相埒所  
著鑑窗瑣話多時賢之作持論名通無標榜輕浮之習

過靈芬館感弔頻伽先生兼贈少蓮

楠 二首

卅里胥塘曳棹遲成連去後我來時荒江尙峙三閒屋絕調  
空行一代詩酒德琴心聊偶託梅兄攀弟自相師草堂無恙  
人尋到要有清風後世知

小閣迴廊絕點塵滿窗圖史尙橫陳誰堪著作追前輩繼起  
風流見替人已免西華悲道路不妨東野耐清貧商量共續  
題襟集壁壘詞壇又一新

贈李香泚丈

富孫



後起亦三李

謂引樹金潤兩先生及丈

靈光獨巋然詞科唐一代

丈曾編鶴徵前

後兩錄

經學漢諸賢著述等身定丹鉛出手編傳人原不易兀

兀幾窮年

贈李壬叔 善蘭

君抱羈愁我抱疴一燈如豆耐人磨  
隱侯但覺腰圍減潘岳  
驚看鬢雪多著作冷誰塵外賞  
光陰悶遣雨中過可憐絕代  
嬋娟子蘿屋天寒奈爾何

計

字壽喬秀水廩貢官安  
吉訓導著一隅草堂稿

車向榮序略壽喬詩多肆好之音桑梓一集徵文考獻  
用備輶軒於詩之義爲風而一變柳枝竹枝格調又風  
之正者也

聞川感舊十首 錄二

哲人今已往大雅實堪師  
講易占茅茹歌風補竹枝  
湖山春

草夢池館夜牀詩獨有煙波交孤吟自在時

周珣著易圖贊  
義周玉電有聞

川竹枝詞句餘居采題陶氏湖山小景有夜牀風雨開  
邊話春草池塘夢裏詩句雁湖釣叟王周有自在吟稿

金閨多逸事氣節在嬋娟梅隴香殘雪梨花鎖翠煙有書能

闕佛不字爲逃禪矯矯徐貞女名賢錄共傳

明閩秀陶淑順  
工古文著闕佛

說張小姑幼字吳歿削髮爲尼吳宗伯家驥題其庵曰守  
貞徐貞女字鼎室子其家落父餽壻罷婚女知之問父匱金

幾何當從命授以百金女輒呼鼎室  
子與之抵暮自經傳載兩浙名賢錄

黃慶澄

字菽田嘉善人官廣東  
鹽大使著書灌齋詩集

坐睡

倦思嘗騰嬾上樓黑甜鄉較勝糟邱手中書卷忽驚墮夢裏  
湖山聊當游欲養禪心須合眼暫消傲骨且低頭童奴未解  
跣趺意爲報門前客刺投

吳

修

字子修號思亭海鹽人議敘布  
政司經歷著吉祥居存稿四卷

兩浙軒輊錄

卷十九

黃慶澄

吳修

畧

L. 5. 3.

靈芬館詩話思亭精於鑒古幾乎以手摸絹可以別宋元明者少負傷才有神童之目爲詩落筆揮灑而天真

流露陳言腐談

無從到其筆端

吳振棣曰思亭性敏悟十四歲已梓所爲詩問世稍長盡交當世知名之士鑒別古今字畫金石尤具精識嘗

集

國朝名人五百六十餘家手札七百通刻之石爲尺牘鑿真十六卷又以生平所得山舟學士手蹟三百餘種鐫尤精者刻石爲六卷名曰青霞館梁帖

余往歲於京師琉璃廠買得明崇禎時吳修字于廷山

水小卷筆意仿大癡又近文待詔惜畫譜不載其人

里居莫考以其與余同姓名也乃重爲裝裱系之以

詩

我昔歸自燕臺旁拾得古畫猶墨香雲煙滿紙窳林壑名姓不著誰收藏由來名重世競愛嗟爾無名何處賣投之敗簞成棄物那堪費錢更裝背我憐與爾同姓名相見未免差有

情裝成展玩還拂拭幽齋獨坐秋窗明人生似爾亦良苦縱有妙筆孰許可我今看畫行自嗟他日何人復憐我

敬書先貞肅公與祝先生淵手牘後

要窮就窮死就死語對孛羅兒戲耳零丁洋句忍卒讀妖夢先聲已如此先公死節甲申春是日同難二十人前身知是文信國以心相印通精神孝廉祝子公舊友別公從容還酌酒待公授命視含斂此事今人復誰有手書緘寄歲在壬商略出處成初心書中猶及昔年夢此心早契劉山陰山陰家居旋絕粒已當失守杭州日碑文全氏孰糾非未悉師承言配食要窮就窮要死就死先公幼時戲作文信國對孛羅語見公殉難書中公於念臺先生爲執友無問業之專全氏祖望撰子劉子祠堂配享門人碑乃首及公其言不當

次韻酬蔡侍講之定都門見贈

好古同成癖相逢快此生賞心矜獨得貴耳笑羣情名爲清  
貧重官應去就輕來朝還造訪剝啄想懽迎

德州訪孫淵如觀察

星衍

者回乘興也東游眞作平原十日留萬卷鄴侯餘蠹字卅年  
晏子尙狐裘宦情落拓憑誰說歸計蹉跎可自由經歲索居  
渾不覺相逢翻惹別離愁

胡光第

字小園石門人  
官兩淮鹽知事

胡慶增曰吾宗小園少有逸才負謀祿養  
咸豐癸丑刑江陷賊遂以身殉遺稿散佚

詠白月季花

水晶簾外露華寒供養芳叢獨自看空谷無人自貞素一年  
對月幾團欒千支暗度留香久色相空傳繪影難莫使惺忪  
魂化去瑤階玉砌步姍姍

辜典韶

字夢珍號乳翁平湖恩貢著荻林詩草

縣志典韶篤志不倦博覽羣書著有篆隸備考芸閣文集又精于六書日本國人嘗求其字

唐子畏秋山策杖圖

一水環山入望遙杖藜閒倚鎮無聊坡陀驀見通行路落葉聲中過小橋

張千里

字子方號夢蘆桐鄉廩貢自紹興府訓導著珠草堂詩

李富孫傳略君擅雅材淹貫通達所著詩若文蔚至於古之立言者平時敦本尚義輕財好施與閭恤里節無愧周官六行之誼顧其業虛附遠近延視無虛日若儕於方技者流則幾以藝掩其學矣

逸林上人

達德

吳香圃茂才

全昌

過草堂話雨竟夕三

首錄二

故人如好雨乘時一傾倒清風與之俱排闥塵埃掃安牀避屋漏几席無乾燥吾儕本脫略何暇計隘湫舍南俯老槐上

有藤花繞著雨愈爛漫軒檻綠陰悄於焉命觴酌杯盤具草  
草知我山廚荒攜榼出鮮蕈翻因客所遺餘味沾童媪麤糲  
腐儒餐客亦勉爲飽人生既賤貧坐對妻孥老庶幾友朋來  
相與滌煩惱

昔我訪凌交

南濱

入門雨一尺滿屋滔滔流柰此秋水白揖

我牀上坐主人雙腳赤高歌破屋詩要我醉題壁今宵聽雨  
情感舊思曩昔伊人邈千載此事十年隔凌交我執友衰病  
江湖客贈我書一篋叢殘少完籍自云物雖微留以慰思憶  
入夜發光怪熒熒古血碧中有先賢書一一經邦畫

謂凌忠  
介公奏

疏忠介丁未造大節炳文策惜哉時務言未得拯飢溺世無

蘇長公遺疏誰復惜鐙下共披吟檐溜淋浪滴願言素心人

永此風雨夕

烏石山謁范忠貞公祠

凌霄臺北翠微東，祠廟巍峩接梵宮。  
畫壁有詩同鬼唱，蠟丸無路與天通。  
游魂暫假威弧遠，恨血終填狴犴空。  
二百年來鯨浪息，靈旗閃海門紅。

徐澐本

字荊周，號梅圃，歸安諸生，著曉巢偶吟。

星子署樓望廬山作

我昔曾走華山麓，奇峯高下互起伏。  
縣延百里互長空，滿眼雲山如畫幅。  
今來匡廬住兩年，朝暮憑闌豁心目。  
吾聞廬山之景甲天下，得見此山心始服。  
峯峯尖削高插天，絕巘迴環如轉轂。  
層巒萬疊深復深，奔流千丈掛飛瀑。  
大壑懸崖屈曲通，中有梵宇琳宮幾千屋。  
樵人牧豎跡不到，況乃窮高目力蹙。  
有時雲從缺處生，非霧非煙而山腹。  
雲光蕩漾山滅明，巖



鬣卷舒斷而續有時夕照耀蔥龍螺髻巖巖青簇簇濃嵐飛  
翠入危樓石罅嵯呀見怪木幻形百出倏忽閒陰晴晝暝看  
不足乃知人事有變遷無怪滄桑幾反覆匹馬秦關感壯游  
景猶在心髮已禿仙人掌華山峯名青芙蓉何如五老享茲福  
五老峯廬山最勝景屢著靈異希夷洞達鐵鍊橋何如三峽泉聲徹空谷明  
星玉女高崔巍金輪雙劍堪比逐廬山華山均是宇內之奇  
觀彼壓黃河此鄙曲古今名山五岳尊我欲延之成爲六

朱紫貴

字立齋鈴子長興廩貢官杭  
州府訓導著楓江草堂詩稿

縣志紫貴工吟詠吳中朱纓序其詩云  
其學贍故取材多其志芳故修詞潔

冷廬雜識立齋有詩名於温州道中得句云沿街牆比  
竹籬短貼水橋如板橙低惟親歷其境者始知其佳諸  
將詩擬杜成於英夷陷甯波

之後旨深語警獨出冠時

錢應溥曰立齋性廉退專事吟詠意有所感卽寓之於  
詩集中擬杜諸作皆卓卓可傳不僅以文采自命也

緝雅堂詩話立齋廣文樞江草堂詩稿多憂時感事之作結響沈雄懷抱岸昇近代詩人當下視謨觴瓶水諸家故罕采特廣

沈孝子詩

名仁業父賈安南娶林氏有二子一女長卽孝子六齡父攜歸吳下父喪大父喪畢乃航

海奉母歸

吳郡有孝子沈姓仁業名厥考遠服賈航海交阯行裊裊寄生草忽來女蘿縈肅肅獨飛鳥忽作鴛鴦鳴異域而同心兩地成弟兄生女何嬌好生男何崢嶸長者爲孝子總角多眞誠隨耶別阿母來至吳閫城上堂拜大父入室思所生阿耶願兒語遠適今未能豈不念女蘿桑榆方積齡豈不念鴛鴦烏烏有私情因循逮弱冠荼苦孝子丁生悲慈幃隔死痛乾廕傾孝子代父職含卹吹陔笙大父旣終養孝子一身輕恩恩治行李惘惘事遠征長跪告戚黨長揖辭親朋阿母在絕

域今將萬里迎不得阿母返有去無來程朝行千山度暮行  
千水經山行有豺虎水行有鯨鯨風霜所刻削瘡癘所薰蒸  
崎嶇閱半載始得踰太平是時彼國內蠻觸方戰爭孤身冒  
鋒鏑萬死披榛荆邨墟已在望茅屋無一楹孝子大駭異淚  
落悲拊膺幸有土人言始知因避兵遷居會安地僻迷哇  
町孝子再拜謝疾走攜行勝竟達阿母所剝啄敲柴扃相見  
不相識相顧還相驚解囊出遺像仰面各失聲憶自六齡去  
寒暑十八更何期一日閒骨肉重合并孝子謂阿母生事羸  
餘羸願侍阿母歸色養當親承阿母謂孝子爾言理誠應所  
慮風土異夷夏如炭冰烽煙日逼近戎馬日縱橫孝子率弟  
妹環拜當中庭阿母首爲肯悲喜交相乘鄰里愛孝子別酒  
斟滿觥酋長愛孝子資斧贈滿篋盜賊敬孝子戒勿犯行旌

關吏敬孝子啟鑰還金縉紆回度芹站才于過雞陵改計汎  
瀛海一葉揚中船中有五指山岬嶠天半撐其旁巒帆閣其  
下蛟涎腥舟前忽壁立矛戟森鋒梭焚香急起禱孝子厥角  
崩黑風吹倏轉隱約來神鏡須臾已出險豈曰非神靈行抵  
海南界疾若雲霧騰關門格例禁百計煩圖營踰年返吳會  
聞者爲涕零計自孝子去兩易蟀與鷓往還數萬里險阻得  
未曾所經府州縣悉數不可勝一心念阿母志正衢自亨歸  
來百事足萱草春敷榮問安夜奉席視膳朝調羹自此十餘  
載至樂輕簪纓木羽俱仙去百世留芳型苦志鬼神感至行  
蠻夷稱況乃閩里近有不聞風興賢子述先德舊事圖丹青  
援筆爲此詩凡百願敬聽

讀續漢書溝洫志

楊焉鐫底柱三郡遭淪胥草菅視民命錢穀糜國儲喜功誤  
一念僨事殃萬夫方略對疏闊尹忠猶伏辜豈同白圭罪乃  
免黃熊誅百姓終可哀師丹言欲獻

寄蔡壽昌時方居憂在里

看雲拋席帽南海訪庭闈去國攜長劍還家著綵衣星霜三  
載別書札一行稀相望江鄉路皋魚淚共揮

歷歷南皮事應

亭伯徐梅詠

倍可哀乍聞游嶺表相繼赴泉臺許

作樊川序

許爲詠梅作詩序未成

能分鮑叔財黃壚重過處曾否一低

徊

諸將

元戎寵冠百僚班其盼膚功指顧閒緩帶輕裘羊太傅圍碁  
賭聖謝東山馬馱殘月宵移帳旂捲清風曉度關隊隊銀刀

人簇擁錯疑新破蔡州還

潛師宵濟費安排誰遣多魚漏洩來爛額焦頭新鬼大短兵  
狹巷幾人回豈容小醜成堅壁敢向危時議將才赤手長鯨  
疇縛取至今燐火有餘哀

寂寂蘭陵破陣歌運籌借箸定如何空將併命憐盱眙終冀  
安邊有牧頗犄角已成猿鶴化蒼黃轉恨兕犀多伏波橫海  
登壇久肯向雷池一步過

翁洲消息斷經年島嶼波濤路渺然風利爭傳王濬艦火攻  
競報李苗船果能志奮中流楫自可功書幕府箋烽燧未消  
憂水旱何人籌及大農錢

雪花消後杏花紅誰掣鯨魚駭浪中鼠目麀頭膺上賞雞鳴  
狗盜奏奇功親賢授鉞風雲壯巴蜀飛符士馬雄不有捷書

馳海甸諸公何以答

宸衷

游弁山沈家洞

徑盡青松林路入蒼山腹一穴訝虛空  
荒荒蔭疏竹探奇爭撮衣導閭急燃燭  
始行猶偃僂繼進遂匍匐口如覆釜缺腰  
作胡盧束晴泥坵龜兆幽竇轉螺殼陳  
疑列八門珠恍穿九曲得非鬼斧鑿恐  
有兩工宿雲氣噓破囊天光逗漏屋古  
苔皆倒生怪石忽斜矗虛響驚鼙颺靈  
蹤聚蝙蝠石乳垂稜稜銀沙湧漉漉橫  
身效蟹行壓頂忱羝觸平生強項心到此  
皆折服中有仙人牀削成類蒼玉地脈融  
春和暝坐耐煩懊出坎頗驚魂嚮明轉  
眩目歸路穿崖根蕩蕩盡平陸

呂山下

我從龍溪沂若水使帆如馬一何駛弁山已過蒙山來芙蓉  
迎面青崔嵬曾是子明練兵處壘嶂重岡莽回互猿鶴全荒  
君子營風雲尙護將軍樹將軍奮身起部曲陸口屯師擁旌  
纛亦知英論輸周郎頗覺陰謀過魯肅江東樓櫓搖白衣荆  
州襲取眞戎機桀犬吠堯自爲主此意未可吳蒙非功成拜  
爵身先死此地空餘舊壁壘土耕時有殘鏃遺山響疑聞戰  
鼓起村前倚櫂剛夕曛無言懷古寒江濱讀書未必無奇士  
只少當年刮目人

七月既望白公祠延秋小集同願文

千里

戈載韋

光獻

沈秉鉅

朱綬

沈傳桂

尤崧

鎮

謝

蘭生

湖山有分狎閒鷗不負新涼是此游曲榭平波先得月晚風  
高樹早驚秋恩恩琴酒酬佳約澹澹鷺花寫冶愁最是白公



隄下水年年無語自東流

友人以馬士英爲杜文煥畫錦霞洞天圖見示題長句

歸之

蔡京筆法儕蘇黃禊帖八百半閒堂自來織兒誤人國未必  
襪綫無寸長請看貴陽馬瑤草畫手居然能擅場舊傳鳳陽  
罷督日宗師北苑許入室是卷著墨何蕭疏應是當年得意  
筆百圍喬木高參天雲梯石磴相鉤連此中風景正殊絕焉  
知滄海成桑田北風吹折白門柳黯然王氣銷鍾阜長江天  
塹竟何如撞破家居是此手征南後裔髯將軍曾擁旄節清  
邊塵賸水殘山縱可寫胡爲倩此煬竈人還君顧廚且收貯  
笑爲老姦著評語略同畫竹韓平原差勝弄麀李林甫

題前明楊忠節公速客柬後

忠節手書速客單曰吳來翁吳雪翁武樞翁文鑑翁

江華翁蔣介翁楊斗翁凡七人後係一絕句三壺六  
標五簋菜豈復寒酸類腐儒讀畫看詩歡竟夕滿天  
月色醉歸途下署門年弟廷樞其下有名印及遙集  
居印無月日按柬中七人皆與公同以習書經舉崇  
禎庚午應天鄉試者故稱門年弟爲鎮江武際飛德  
化文德與金壇江潢蔣鳴玉楊良弼吳江吳昌時無  
錫吳達也藏  
長州顧氏

六碟五簋酒三壺看詩讀畫興不孤七人居然號大會折柬  
一一煩招呼清流白馬悲前史應社本先復社起道廣何曾  
似太邱門高自是推元禮依草埒木吳昌時無端好事推廣  
之瓠珠有時混美玉椒蘭未見雜葦蔬是時朝局已如沸桴  
鼓東林結遙契欲持清議遏姦回轉使禍胎兆文藝儻如此  
會能率真同心落落六七月泉詩篇竹林酒豈非明哲堪  
保身先生故是忠孝士慷慨能爲國家死偶然治具召賓朋  
亦復食單有條理儒雅風流名解元臚句應編古柏軒悵望

蘆墟泗洲寺好持片紙去招魂

紹興十六年同年小錄歌 有序

此宋高宗戊辰科王佐榜進士題名錄也制策以漢光武爲問而狀元以下三人均會和議甚力所以取重於世者徒以吾祖文公名在五甲第九十耳從妹步沆出藏本相示賦長歌一篇

不都建業都錢塘中興安得如南陽制策猶問銅馬帝大儒挺生羣玉鄉欲爲朝廷措大事末甲僅試同安吏佩韋誨木期無慙盧後王前那屑計是時南北已議和君臣酣宴銷金窩諸將怏怏罷兵柄羣兒袞袞登巍科君不見梅花早擢郎君第賦草更署學生字幸免前列黜放翁未必主文如陸贄螭頭奏名第一人誤恩曾乞襁沖真對策依回均和議揣摩

亦復諛老秦餘子紛紛何足數  
差喜詩翁作同譜尤延之名在第二甲  
科目何曾關重輕姓名自可垂  
今古康了年年笑腐儒  
通經敢望祖庭趨  
好將一卷同年錄  
長伴千秋道統圖

韓蘄王墓碑詩

有序

墓在吳縣靈巖山西麓碑文孝宗時奉敕撰墓荒亭墟吳士大夫議有募修之舉尤君崧鎮先來索詩爲

作是篇

尤君手拓韓王碑邀我試作韓碑詩  
碑高三丈廣六尺眼底韓陵一片石  
譔文誰丞相雄書文誰周益公  
輝煌天語重華宮耐葬更有夫人同  
當年金山播大鼓墜騎紅袍色如土  
惜哉坐喪垂成功英雄此恨何時窮  
洵沙官向河南設朽木鐙槩不歸骨  
兩宮未返臣心悲祁連高築夫胡爲  
犬嗥侍郎南

園客輒敢磨礱墓前石誰與補刊第二碑碑額攫去鱗之而  
冬青樹種蘭亭路南枝樹擁岳王墓玉魚金盃大悲涼風馬  
雲旗定來去此閒好事得數公碑亭重建石鼓峯彥章彈文  
次翁疏片紙零落隨飄風君不見牧羊亭接旌忠寺突兀穹  
碑無一字寒蕪荒壟西風吹行人爭唱誠齋詩

湯參戎

貽汾

爲寫嚴陵春汎圖見寄賦此志貺

將軍曹霸丹青手肯貌尋常行路人嬾我滄江狎鷗鷺期君  
它日畫麒麟

江山一片清空處著我孤帆露簑船記得釣壇朝放溜杜鵑  
如雪雨如煙

岳忠武王畫象同沈

亮

作長句轉韻

君王浙臉相長腳少保那能作李郭當時已慟風波亭後來

不上昭勳閣誰與下筆工傳神紫袍玉帶眞天人想見橫戈  
萬人敵紅羅旗擁背危軍敵國君臣畏如虎太行忠義愛如  
父吾知耿耿一片心縱有丹青難貌取君不見和議書成畫  
兩淮何須將相繪雲臺龍髯已向冰天墮腸斷遺容北地來

游邑西諸山訪陳景帝陵昭烈王墓於紫金澗采白蘋  
花而歸

西出長安門外路今朝飽看故鄉山紫金橋下潺湲水畫若  
分流共一灣

運去侯王亦可憐石麟殘缺臥荒煙人間尙有青烏子苦說  
谿山好墓田

晚風吹壓帽檐斜點點松林集暝雅人在四圍山色裏自臨  
西澗采蘋花

宋岳忠武王玉印歌爲震澤王之佐作

嗚呼不取金印贖玉印父老痛哭王頒師當年簿錄江州時  
印也匿迹何所之得毋亦如茂先將遇禍寶劍化作神龍飛  
蒼螭入水白虹見妖魑辟易神祇司至寶有晦亦有顯馮夷  
捧出湖湘湄出入焉用王進背篆刻未必舒通爲王昔涅背  
奮忠勇荆襄開府軍符馳背鬼軍來龍虎走拐子馬破烏珠  
嘯戰陣偶聞筆陣展私印定復官印隨揮灑松庵桃谿墨高  
唱怒髮衝冠詞申甫英靈桓侯諱紙尾一一鈐芝泥嗚呼王  
也大名宇宙垂童稚婦女誰弗知莆陽魯公藏獄案竹莊行  
實題歌詩矧茲銀鉤鐵畫寄靈爽威稜何讓紅羅旗高高棲  
霞嶺蔥蔥向南枝銅爵尙完好鐵象知忸怩王郎得此印曷  
不歸王祠況有照膽臺中漢壽印神物兩兩相光輝中興御

寶亦何有僉名和議方稱兒兩宮劒佩斷消息玉龍雙紐空  
自冰天歸

顧侯虎兒歌 有序

侯名治乾隆癸卯舉於鄉謁選得成固令縣有虎患  
侯禽而檻之甚馴擾呼爲虎兒每聽訟有疑不決者  
以扶南王范尋法治之邑大治調禮縣會逆賊王三  
槐擾隴右侯奉檄轉餉羸兵百人以虎自衛霧中誤  
抵賊營則縱虎搏戰賊駭逸大吏羅致幕下未幾虎  
中毒死侯亦病卒奇其事者競爲詩歌以詠之余亦  
作是篇

爲政不作封使君義兒乃有寅將軍咄哉顧侯事奇絕景升  
豚犬徒紛紛侯昔宰成固下車咨疾苦父老再拜言豐年多



徐叅作橫亦無鄉里豪但患偏蹇有白虎侯聞此語心氣豪  
短衣結束鐵索操突入虎穴得虎子虎若伏罪無咆哮侯語  
虎這爾死爾當但食麋鹿豕我當撫爾如撫子虎雖不能言  
亦復搖尾帖其耳瑟瑟鼓聲朝放衙虎如神羊能觸邪侯喜  
虎歛爪侯怒虎磨牙有時倒臥印牀側花影滿身西日斜何  
來小醜干天紀侯也奮袂勤王起前驅突遇蒼頭軍侯顧笑  
曰狐兔耳彼何敢當我虎子虎人立侯虎吼棄甲如山賊兵  
走幕府論功書某某如此奇功得未有軍中得一侯羣賊聞  
之心膽愁軍中得一虎羣賊見之神色沮侯能擾虎如擾民  
彼非忌虎乃忌人瑤樞星光黯無色五龍不復來作賓虎兒  
死虎侯病李廣難封蓋有命生能比續扶南王死當配食不  
其令我聞人壽可百歲虎壽可千春以虎爲父古則有以虎

爲兒今始聞柰何虎死人亦死惜哉顧侯眞虎臣

往來茗警閒小詩自遣

姜白石待吹簫去杜紫薇仍載酒來聽雨有時煙艇泊看山  
終日水窗閒

吳蠶浴後桑雲滅謝豹嗁時花雨稀不看城中木芍藥來尋  
郊外野薔薇

分來臘尾若谿酒乞得明前羅芥茶已識山林勝鐘鼎要將

紉綺易桑麻

故鄉相知  
分餉茶酒

宛若無端歸曼倩孟光相伴是梁鴻如何賃廡千年住不費  
抽帆一日功

歲暮書感何大令

凱揚三律

三吳財賦地頻歲苦愁霖那有禾雙穎空稱畝一金哀鴻誰

戢羽碩鼠自回心未免尊鱸思幡然念故林  
浹日瀟瀟雨連村滑滑泥抱茅乘窘步騎屋伺幽棲已被飢  
寒迫難憑法令齊幾時雲吐月流影照窮黎  
朔風門外急積雪倚愁看未穩袁安臥徒增范叔寒凋年人  
事迫荒政吏材難是處嗟珠桂身家慮轉寬

遣興

自憐城西屋閒屏慣不開連牆機鑷響穿巷水筒來竹借鄰  
家看花慳隙地栽惟餘沈麟士相約試茶杯  
謂謝亭  
伍相吹簫市梁鴻賃廡居昔賢猶浪蹟塵世本遽廬門少雀  
堪網庭無草可除劬書兼善飯用意未全疏

伊大令

念曾

爲作分書楹帖長歌志賦

書官閒讀書樂  
親健得天多

字蓋未知僕  
之永感也

國初以來書八分谷口鄭籟尤超羣曹全一碑最後出俗書

摹寫肥失真揚州太守

謂尊甫墨卿先生

得古趣下筆瘦硬能通神

渴蛟掉尾飲絕澗飢鷹側翅捎層雲五侯屏幃走相索鐵門  
踏破何紛紛我昔見之發嘆賞無由乞寫白練裙驥兒晚出  
有家法日費斗墨研摹勤仲穆書品繼承旨大令筆陳追右  
軍尤工擘窠世莫敵天骨卓立如蘭筋投我驪珠一十顆比  
韓擇木蔡有鄰懸諸三閒打頭屋異彩煥發騰龍賓我來安  
陽一無事圖書千卷常隨身揚雄奇字未嘗學故應門無載  
酒人況復薑芽手常斂春蛇秋蚓相等倫差喜四時有真樂  
官閒合讀冰雪文獨恨皋魚抱隱痛大年空冀同靈椿備書  
縱許東觀讀采蘭那得南陔循吟君贈句頓淒惻令我俯仰  
悲鮮民火速作詩拜嘉貺自笑老禿中書君惜無阿買爲我

寫嫖女來效西家顰

別瑞安諸同學

頻年匏繫海雲邊家遠吳閩路一干括嶺西來山作國甌江  
東盡水連天鄉心鱸膾蓴羹外旅鬢蠻烟罨雨前未免浮屠  
三宿戀分攜今日轉淒然

秋雨秋風作意涼行期草草檢行裝黃花笑我無新雨杜宇  
催人返故鄉鮭茶船輕書卷重江湖日短旅程長只慙虛擁  
臬比座經義齋前帶草荒

平生心蹟白鷗知紫陌黃塵恐未宜手折垂楊悲老大身如  
歸燕感孤羈蘭成詞賦工何益杜曲桑麻種豈遲慙愧諸君  
籌盛饒臨歧斟酌酒盈卮

諸生四十餘人  
釀餞於東門

夜發至郡城

經年歸思繞鄉關，纔得扁舟一櫂還。  
今夜金釵河畔月，霜風壓鬢看青山。

歲暮遣興兼憶窮交得八絕句

殘年風雪送窮時，騷屑心情百不宜。  
結習依然除未得，翦鐙細琢九寒詞。

周南張北時相過，連袂翩如接翅鴉。  
也算中年陶寫事，一瓢同喫市樓茶。

注琴山沈僊菴

橐筆依人年復年，新從淮浦汎歸船。  
近來可有張平甫，供養鄱陽白石仙。

戈順卿

聞道硯田多惡歲，韋郎顛顛甌甌生塵相。  
逢且貰寒壚酒，何物錢刀苦累人。

召緝

苦憶茗南榆蔭樓，三年不見見生愁。  
賈收新悼雙荷葉，老淚

揮殘雪滿頭

奚子一復

下賢琴劍客天涯臘鼓聲殘未到家桃葉吟詩兒問字短篷

江路看梅花

朗亭

韓愈書稱前進士魯山官比小諸侯爲君更轉逋翁語并覺

長安不易游

何絮人時將入都

寒欲衣時飢欲飯誰能入世澹無求自家已是愁如海更替

窮交愁未休

### 郡齋遣興

消受先生苜蓿盤可憐頭上進賢冠村夫子待攜家具鈍秀才還作冷官儘許浮沈何礙嬾生成骨相卻宜寒中年纔得霑微祿來日依然笑大難

潦草鄉書字脚斜吳淞路近擬移家聽殘暮雨瀟瀟曲試看

春風緩緩花小著青山新戶口大言絳帳美生涯蘆簾紙閣  
經營處終覺初心負鹿車

差喜西湖作比鄰舊時鷗鷺許相親樓臺近水何須月松桂  
凌寒未遇春數仞牆邊打頭屋百僚班底折腰人吳蒙畧有  
嶽寄氣柰此應官聽鼓身

環堵蕭然半畝宮草堂髣髴杜陵同刪除惡竹虛生白培養  
名花淺放紅詩本酒痕今舊雨青衿朱履馬牛風安閒只此  
還逾分敢道微軀賦畀窮

龜魚鐔歌爲無錫華

學熹作

爛然古質精且良高一丈有六寸強上徑八寸闊以九寸計  
下闊七寸徑則六寸長厥鈕有龜首則昂魚非魴鯉非魴鱧  
科斗文四蝕其一郭公夏五難形相博古圖試相較量懿範



曾不爽豪芒惜無銘詞紀年月蒼姬炎漢徒推詳我聞金爲  
樂器古有六鏡鐸鐻鑄交鏗鏘鳧氏鑠銅鼓人掌和鳴應節  
龍頭櫂又聞矛戟銅鑄亦曰鐸同名異製非雁行兩軍相當  
鼓相望兩軍相當鐸鼓相望淮南子語大旂卓立聲雷碩壯士聞金比聞鼓  
不愆步伐管戎羌方今小醜猶跳梁蠶人鼈令頗蹶張赫然  
天討撻伐彰樓船百斛來龍驤大鳴鞞鞞蛟鱷藏鯨鯢駢首  
空悲傷朱鷺一曲諧宮商十洲三島爭梯航然後

天子垂衣裳羣侯劔佩朝天闕功成獻馘馨蒸嘗九成簫管  
儀鳳皇在藻鎬京沐聖化負圖瀉水徵天祥鐸兮戎器亦禮  
器胡不昇之貢玉堂

吳越王酒庫瓶詩

臨安縣治南五十步地下舊酒瓶甚多蓋吳越王時

監酒務處也歲之元夕金岱峰

宗衍

於雪中掘得之

惠我一器并媵絕句四章依體奉酬以志雅贖

錯疑荷鍾瘞劉伶風雪臨谿得酒瓶此日金錢曾買夜玉羊  
銀鹿久飄零

瓦盆髣髴此田家持贈吳儂敢拜嘉自笑盃鎗曾不識只思  
亂插折枝花

待緡歐史修瓶史記讀江東使宅詩酒務蕩然除權算不知  
何似五經兒

配我雙魚典午磚相攜茗椀筆牀邊褐夫睨視冠纓絕入市  
何曾值一錢

戰城南

戰城南悲三鎮也守定海自八月十三日至十七日

督兵血戰五晝夜眾寡不敵同時陣亡三鎮者壽春

總兵王

錫朋

處州總兵鄭

國鴻

定海總兵葛

雲飛

也

戰城南復城北心報國手殺賊賊兵蟻集我兵稀飛函告捷  
請濟師登高遠望見旗幟譁呼謂是官軍至豈知賊兵假我  
衣卻從後路來合圍是日風狂復雨急火中格鬥雨中立礮  
聲隆隆達鎮海鎮海城中督師在援兵不來來亦遲悲哉武  
臣安可爲武臣不可爲君不見海天月黑魂來歸武臣不可  
爲而可爲君不見千秋俎豆昭忠祠

蛟門行

蛟門行美李縣丞也鎮海甯波相繼失守獨縣丞死  
之縣丞名向陽雲南趙州人

蛟門兵散孰爲守武官走耶文官走不走獨有李縣丞從容

畢命朱絲繩堂堂守土官不聞一人死將爲犬羊晒實貽薦  
紳恥昔人感意氣捐軀報知己何況仕

大朝執贄列羔雉苕郊齊君弔鍾山蔣侯祀曾非五乘賓亦  
祇一命士愛民生好官殺賊死厲鬼縣丞雖資郎志節豈不  
偉吁嗟哉高車駟馬何紛紛舍生取義能幾人它年直筆紀  
國史賊陷鎮海縣丞死

募義民

踐土食毛二百載不知何者爲義民義民半從情民出什什  
伍伍來成羣朝坐茶亭中暮飲酒壚側一身無家復無室義  
民之樂樂何極旭日始旦城門開呼名對簿雜沓來儻得淮  
陰將兵善自可驅之背水戰我聞商弦高犒師卻敵國又聞  
董汪躋執戈衛社稷汝輩果義民曷不出死力日給三百青

銅錢免使飢寒化盜賊嗚呼安得長有三百錢茶亭酒壚年復年

建義柵

義柵高高賊不能逃義柵蕩蕩賊不可上二更三更鉦聲柝聲籠燈執挺疇敢夜行刁子道左官來巡邏後柵已關前柵鎖舌做脣乾不得過天陰月黑風淒淒柵中義民高枕臥

買荒謠

報雪荒買雪荒鴻雪五尺六尺強不問雪深若干尺但問錢輸若干陌畝輸四百青銅錢非荒田亦成荒田  
報雪荒官不理農夫愁嘆吏人喜汝無四百青銅錢報荒那得成荒田

婦拔頭上釵夫典身上襖持錢輸官前日去催租下鄉今日

到敵輸四百青銅錢荒田仍復非荒田

幽憤

酣燕漏舟中自謂俯仰寬高臥積薪上自謂衽席安吾儕固  
小人朝甕忘夕餐堂堂擁旄節位壓鵷鷺班防秋警刁斗銷  
夏羅盃槃豈知荷戈士嗚死途路閒秋空炳太白徹曉光芒  
寒請纓豈無志仗劍良獨難

抽刀試起舞謂是百鍊剛豈知歐冶劍已作哥舒槍昔梁大  
通中兵仗啟上方以彼歲月久朽敝固其常不聞礪新發乃  
同庫舊藏莫具函人心徒摧壯士腸旁有睨者笑此意非爾  
詳等爲委棄物焉用精且良

從軍有苦樂但問所從誰桓桓大將軍坐擁熊羆師朝陪南  
館燕夜賦西園詩圍碁對明月羽扇招涼颺舟師昨奏捷盛

言賊勢衰參佐及賓從一一超階資句章纔揚帆滬瀆已合圍何不敵王愾談笑揚天威

進死退亦死百死求一生畏死荷寬典惡生豈人情國有廉恥將將有節制兵忠義相勸勉賞罰嚴且明士亦樂爲用屹然成干城生當奏茂績死當垂英名賊來何籠東賊去何猗猗僕射但姑息豈遂稱父兄

狡寇倚姦民如虎導以佞姦民倚狡寇如狙從以狠陳平閒亞父重瞳悲天亡秦人閒信陵魏國遂不强懿惟骨肉親兼之股肱良疑忌構形似秦越生肝腸豈有勢利合膠漆能久長誰與出密計繫頸誅中行

時事憤所切沈吟不可道俯仰塵土閒未知何者好徵調天下兵計當風籜掃洪惟

陛下聖樂天大字小錫以無事福道彼有罪討堅請允羣議  
市舶通海島達官老於事身家計誠巧嗚呼犬羊心勿謂久  
可保

有人不患寡有國不患貧人材苟消乏國勢何由振周宣復  
置土方召爲虎臣唐肅殄安史李郭成大勳紹興主和議歲  
幣輸強鄰嘉靖通馬市邊事多紛紜雅歌頌元老師象誠小  
人未能決成敗先欲分猶薰

湖上

漸覺西風撲面寒買花載酒一憑闌可憐無限青山好都付  
游人醉眼看

紡鐙課讀圖爲羅蘿村通政題

霜風滿屋嗚酸雞當戶軋軋宵鳴機孤兒抱書機畔立伶仃



惟有寒銚知寒銚照紡復照讀書常苦飯不足縱然飯不足  
有棄短檠什一逐織我一端布易我一斗粟有年尚飢何  
論無每飯不飽何況粥但願兒埋頭矣恤母枵腹母粥母心  
慈兒飯兒心悲烏欲反哺去雛乃離巢飛可憐枳棘上那合  
鸞皇棲鸞皇奮翼天閭翔陸離五色多文章朝游元圃側莫  
宿蓬池旁願銜竹實歸飼母暫辭珠樹還故鄉咳有蘭泉有  
菊羅芳甘酌醴醑前穰銚今蓮燭前練裙今綵服五鼎方娛  
莫景長百年終恨春暉速請弗念杯棬請弗感風木苦心美  
報如相期手奉

龍綸天錫福不見宣文經敬姜績千秋女史傳芳輝請將中  
壘赤心筆書與人間作母儀

烈女劉七姑詩

烈女平湖縣學生東藩女家乍浦壬寅四月夷難投  
井死

胭脂井不免死澄波莫洗亡國恥銀瓶井不願生孝娥千載  
流芳名黑雲壓城城欲墮鯨魚磨牙礮飛火踰闕一步無死  
所父母天只莫誤我生歸九淵魂九天石闌月冷悲啼鵲嗟  
嗟弱女子立志決一死裹糧坐甲多丈夫臨難誰如劉七姑

果恭人詩

恭人塔塔拉氏壬寅四月乍浦陷恭人率二女稱姑  
榮姑至署後投井死遂以井爲葬所築亭覆焉事聞  
封節烈恭人

乍浦城朝不守虜者虜走者走卓哉果恭人憤氣悲填膺恨  
非夫人城繡旗卓立金湯成恨無娘子軍爲國敵愾屠長鯨

國家豢養二百載聊以一死酬恩榮婉變兩鳳雖亦復願死

不願生井中水清且泚井中人長不死豐碑突兀亭中峙恭

人姓氏耀彤史恭人誰鑲黃旗游擊女甘肅鎮海營游擊岳公明女佐領

妻乍浦駐防左營佐領果仁佈元配

魏星杓字聯奎號岬夫長興廩生著堯市山房集

王以銜傳畧魏子岬夫雉邑隱君子也少讀書負奇氣稍長慎交遊恥干謁鍵戶冥按斬至於古之立言者不苟徇時好少耽騷雅所作近體直

邇唐人古體出入北宋諸大家孫德祖曰岬夫編輯邑中已殤詩人之未梓集者著有采若編阮氏輜軒錄多采之

和東坡遊道場山何山原韻

吳興城南富林麓高人自古耽邱壑道場飛翠撲城樓鎮日

捲簾看未足十里湖陂接緜漫行緣香篆路紆蟠松吹迎風

雜清聽泉聲咽石驚奔湍須臾絕頂穿雲出幾輩縮流敷講

雜清聽泉聲咽石驚奔湍須臾絕頂穿雲出幾輩縮流敷講

席文筆休誇翠堵波法幢自爲禪宗植四顧羣峯羅髻鬢讀  
書堂在蒼嵐閒古人易逝不復作千古姓氏留空山莫辭夜  
遊更達旦試向老僧參偈半當年淚墮峴首碑此日憑誰同  
慨歎

春暮同人遊道場山

春山擁髻鬢雨後濃於黛城南選佛場登臨饒勝槩瑤席詠  
坡仙子心夙所愛往來茗霽閒輒喜浮嵐對今朝趁新霽出  
郭邀朋輩扁舟抵林麓松竹互蒨藪青鞋一綉輕徑入翠微  
內掬泉漱雲根足力勇鼓再塔影涵具區北牖洞庭在羣峯  
攢西南俯眺何細碎因參伏虎禪彈指忽千載拈示同遊人  
無爲空歎嘅

武康雜詠

河橋新漲碧琉璃  
漁弟漁兄倒好嬉  
撥刺笑牽春網重  
琴高三月出波時

節物關心每忘歸  
社公雨細卻霑衣  
春蕪綠徧銅官路  
只有尋常燕子飛

兵燹會更幾度來  
繡經高閣鎖蒼苔  
零縑賸縷誰收拾  
空與殘僧話劫灰

簡王丈西溪索畫墨竹

白髮飄蕭老隱居  
閉門養疴世情疏  
秋深一片江南雨  
憶否

京華夢醒初

梅道人自題畫竹云涼風起研池葉  
葉秋可數京華客夢醒一片江南雨

題竹林鷓鴣畫

南望瀟湘動楚吟  
黃陵廟裏落花深  
不知畫本緣誰拓  
中有羈人萬里心

春日同人訪鳩柴係朱贅翁隱處

鳩柴依東郭春風約共尋百年耆舊盡三徑落花深高尙耽  
眞樂歸仙愜古心至今留畫本連理結楓林

贅翁著有畫莊歸仙譜最樂堂

詩文集

和王駝南贊府中秋對月書懷次韻

聽徹新詞若水涯

先是有若溪竹枝詞爲時傳誦

更傳月夜話歸槎

丁未冬轉餉臺

灣夢裏還驚泛客桂原倡句也

陸生散盡千金橐潘令栽成一縣花

去年春會署令

篆差喜放衙稱吏隱且爲餘事作詩家療飢若問衡門士願

掬寒泉飯巨麻

乙卯春日絕句

花事怱怱更倚闌東風簾外不勝寒櫻桃雪後棠梨雨留取

春光護牡丹

日出三竿宿雨稀  
拗兒上砌綠初肥  
廬窗半拓筠簾敞  
好待營巢燕子飛

送隱者還山

高尚與世隔  
幽棲何處尋  
偶然入城市  
賣藥兼修琴  
歸棹碧溪香  
閉關黃葉深  
煙霞儻可乞  
聊以滌塵襟

梅

相思如故人  
相見轉相親  
偕隱約堪踐  
買山資尙貧  
霽融連日雪  
香遲隔年春  
一笑破岑寂  
不分誰主賓

春杪愛林歸自粵東見過

芳草天涯奈別何  
鷓鴣聲裏落花多  
七千里路客初返  
九十日春今又過  
吾道長貧甘寂寞  
汝年方壯莫蹉跎  
遠遊差足強人意  
曾上高臺弔尉佗

孤篷

孤篷三板窄野趣博林塘豈有人同濟而無壑可藏閒將詩  
畫載穩住水雲鄉鷗鷺莫驚避年來機已忘

擬從軍行二首

戰血膏原野三年骨未收將軍幕下客談笑已封侯  
投筆請從戎揮戈誓殺賊一紙新詔書頓改旌旗色

六如居士祠墓在桃花塢歲久蕪廢平江唐明府蠲俸

修葺作詩紀事次韻四首

錄一

爲惜榮名轉累名才高空復俟河清

見徐昌穀文

只緣買櫝珠長

棄比似彈棋局不平絕世風流多放誕佯狂心跡自分明如  
何江表無雙士數卷楞嚴了一生

自遣雜句



勞形擾擾役塵寰  
顧我翻因病得閒  
坐策茶勳消藥福  
吟肩雙聳瘦成山

尊塘口占二首

五里迴塘一丈溪  
兩三村落埭東西  
老農撐箇瓜皮艇  
趁得新晴出鬻泥

東風幾日弄春韶  
殘雪無痕凍盡消  
好與釣師成後約  
一渠新水種魚苗

周

昱

字見薪長興諸生著笠雲詩瓢十二卷

縣志昱博通經史子行恕少負雋才早卒昱慟之遂杜門謝客伏案耽吟春秋佳日放浪於茶峯東溪閒水咏山謠哀然成集烏程陳焯序以行世

題家姊節孝坊

姊歸董中陵我

矢志期爲二姓光  
非徒節操凜冰霜  
窺圍繁露華初茂  
在沼

芙蓉葉亦香始信齊家元有道誰言生女不流芳甫來松柏  
千千樹幾見根株作棟梁

哭亡兒行恕

黃泉輒當睡鄉觀

兒告終詩有日生也如寄死也如寐

未必中心了不酸記得

臨終時一語別妻容易別親難

銀海光搖花欲生衰徵久已到雙睛更教滴盡殘年淚不許

今朝不暎明

施惠心

字中孚號柳村孝豐諸生著雙梧桐館詩集

縣志惠心與兄應心並有才

子之目著述極多載藝文志

張迎煦傳畧施氏以學行世其家柳村晚出所爲經義  
文辭沈博極麗淵乎浩然瓊瑰特異樂府歌詩纒纒數  
千百言搖筆立就老書生橋舌讀不能終一篇柳村眉  
目媚秀若畫弱不勝衣淡於取名而其爲學之志特銳

題龍堂山菴壁

龍堂龍去幾經秋中有幽人跨犢游十里松花佳句在祇今誰識慎湖州

張來儀歸雅圖歌

黃雲黯淡日脚沈寒颯疾捲楓樹林烏烏啞啞千百羣聯聯翩翩落層陰欲棲不棲起盤陣翅掠倒景斜流金追飛銜尾集接翼投林激箭各有心枯梢踏折不肯墮嘴爪便利擊復侵物之小者性最黠貪得患喪渠頗矜先入爲主計宜早窮高失居慮未深後棲無枝苦嘯殺可憐市樹瘡瘡音誰其搆此聒噪形竊恐鳳皇羞欲瘖司丞作詩如作畫恢奇肆縱馳駸駸司丞作畫如作詩譎詭殊狀洪淋淋雅多莫多於巴陵司丞故鄉在江潯兒時定挾蘇台彈勁靄洞落修翎黔佛狸祠前一片鼓驚起無數靈來歆台向江邊添古廟圖中何人

殊惜惜得無坡公靈隱游孤煙落照迷遙岑以指畫肚不可  
摹萬想雖滅留高吟此時棲雅正畢逋語妙道出蹊能尋著  
箇山中歸來人詩思畫力同深湛幅巾白袷澹容與背後小  
奚囊一琴但見當頭舞紅葉不知木葉皆飛禽自非善詩如  
司丞縱有天趣筆不任憶彼學易踰山陰繞城圍噪占妖祿  
後來避兵僑武林卜居終歸戴山涪吳興風土熟聞見目送  
歸鳥愁蔽霧長興啄食安吉眠吾鄉種麥時苦  
鳩故有此諺麥田啁徧羅  
難擒租稅火急種狼藉農家莫夜寒無衾或欲繪之陳國風  
徵書再被修朝簪不署山長署舊史頭銜押出瑩琅琳龍江  
騎鯨去已久惟有此畫傳到今塗雅古墨纔幾痕夕陰平楚  
涼蕭慘我歌苦學靜居集乃刻船板求霜鐔北人喜雅團飯  
接南人惡雅方書禁狎漚集枳信我適庶幾司丞瀟灑襟

滕學博光組

齋頭觀黃筌翠竹歌

廣文先生食無肉後園尙有三竿竹便要移來供晚涼鷓鴣  
雖長苦難刷瀟湘迢迢幾千里坐無長房地誰縮細香不動  
風暗生書帙酒尊恍浮綠疑有粉露侵客衣渲出碧雲駐君  
屋高枝亭亭根半隱所南寫蘭難著足亞枝巒巒勢掀舞想  
見坡翁宵把燭那識此君更前輩點翠含黃定非俗當時專  
家有李波及吾仲寶施並卓卓縱然絕伎太寥落卻少流傳  
到吾目筌初待詔錦官城看盡芙蓉江水淥如京副使安足  
重弱冠聲名動全蜀不貌深紅梔子花勻縑偏染猗猗菴孫  
位光李昇稷各師法眾妙爭長在兼畜至其模範青琅  
玕自是君家勝華獨筌竹師滕月祐敷色鮮新筌亦能超脫孤高神  
未屬自從昭儀坐南軒月華如水扶寒玉窗閒偶意塗麝煤

坐使龍賓露頭角孤竹一派墨胎盛都把丹青東高閣顧子  
作畫愛寫生幸爾千年尙完幅先生撫玩久忘味三月齋頭  
甘苜蓿有時看竹但飲酒或可賺以缸面醪攜歸臥對九疑  
陰子門前山名面壁宛在三湘曲二妃夜跨雙鳳來一片斑  
痕淚相續請君來和西山詩挂冠何必賞營谷此處挂冠涼  
自足施西山

玩友人庭  
竹句也

張平山水墨人物雙障歌爲弟根題

有明一代畫人物奇偉獨推江夏吳儵遠師道子得家法縱

恣不復相臨摹誰其繼者張天馳深入堂奧真吾徒指頭肘

後尺寸熟顧瞻步武曾無踰生面栩栩氣磅礴唐裝晉束被

服都下筆蕭然足古趣秀逸那關腴與臙一種邁勁直到骨

神妙遂爾吳生俱自從梁苑來太學平山大梁諸  
生入太學不異供奉

殿上趨

吳小仙嘗供奉仁智殿中

零縑斷素落人世珍重何翅雙璠璣北

方學者多聞之錯出惡道紛邪魔壽陵邯鄲互跼屣妖倡豈

足贗名姝千載衣冠眼自有似此終與凡手殊次翁真蹟近

閒出河梁風雪貌李蘇伯也津津口不置惜予未見空躊躇

家兄近爲子言吳竹巢師家藏小仙李陵別蘇武圖未得見也

令弟生小頗好事購此雙障

羅緙廚譬如虎賁典刑在熊掌不得猶得魚使我病中快先

覩淋漓挽脫歸藏儲詩成恂怳憶朱十題罷明妃出塞圖

太史有題張平山水墨明妃出塞圖詩

陳詩香

字約蘭號芸閣僅從子郵人著壹宿齋詩集

雨夜

小屋低如舫孤眠靜若僧滂沱中夜雨明滅一星燈宿鳥驚

巢墜跳魚駭岸崩此時渤海客愁夢正瞢騰

用昌黎病中贈張十八韻呈叔父

斗室愜台詠短榻聯南窗敵愾豎吟蠶聲促鼉鼓逢吾叔老  
詞伯名滿東海邦十載大匠門持筴洪鐘撞九鼎置眼前努  
力欲共扛見予北戈三喜弟南金雙所作出百鍊擲地皆錚  
挺才多價重陸氣縮鋒退江細碎修月斧虛無馭風幢豔囑  
花四照高窺星九杠大罰鯨飲海小渴雞浮缸呼僕起雷鼉  
每每添殘釭搜奇骨力張索苦鬚眉厖措頤常自窘強項不  
爾降瘵疾展肺腑飽腹銷脰肛收羅百家言詰屈成紛咙二  
子所棄吐吾足取以龐豈無陽春曲兼采巴人腔亦有萬丈  
瀑不能扼奔瀧拳石雖至微尙足增崎嶇龍舟萬斛大繫以  
徑寸椿險韻偶學步莫笑溪流淙

陳詩裔

號繩祖詩  
香弟鄞人



同家兄用昌黎韻呈叔父

暝色不見日取明窺小窗盲夫覓鴉炙決拾隨甘逢譬諸夜  
郎侯誕語夸漢邦井蛙謗滄海未受洪波撞使之駕修梁脅  
折不可扛黃子與我兄名重蘇李雙頑石悶聲響鏤刻強使  
縱繁質賴康樂審音得文江騷壇兩詞客蒙幸陪節幢征帆  
卸山郭正喜成徒杠官廚啟冬釀合座催倒缸醉後興倍豪  
通宵話銀缸詩書飽閒暇頓覺雙頤厖心希班門弄氣不聊  
城降枯腸窘搜索舊疾發痔肛單方問庸師百藥彌雜咙何  
如守禪寂遠法居士龐好勝不自抑客氣盈空腔始知細流  
水那得扼怒瀧如以石質礪仰求對崆峒千里蠅附尾百尋  
蠓緣椿從知大瀛波不拒東流淙

董承濂

字洪菽號蟻巢慈谿諸生  
著柔泉詩草翦燭詩話

曉渡錢塘江

細雨西陵道登舟趁曉行潮平千浪靜風順一帆輕宿霧迷江樹殘星落石城蒼茫煙水闊無限故鄉情

再登狼山

孤峯高鎮古崇川策馬重登意灑然海日半輪消蜃氣松岳千尺聳龜田雲開塔影來天外風送潮聲到寺前南望虞山波靜處中流隱隱有歸船

董桂芳

字萼舟號靜齋慈谿人著醉蘭草堂稿

過竺峯寺小憩

偷閒入野寺心境片時涼松竹迴門徑風幡靜法堂綠深牆  
畔草清愛佛前香不負今朝興歸途指夕陽

胡于錠

字漢傳號屏山鎮海廩貢官長興訓導

雨後游碧巖用東坡清空世界字韻四首 錄三

吳興富邱壑碧巖尤擅名幽討約正踐夜忽縣雨聲已蠟阮  
生展且作看花行拏舟汎新漲夾岸桃花迎看花復命酌飛  
瓣黏桃觥薄暮抵弁釐天意慳老晴何時掃積翳頓洗峯巒

清

前一日雨中  
泛舟看桃花

詰朝雨聲斷日射篷窗紅浮嵐澹方霽山色逾青蔥遂果入  
山諾健扶兩腋風石磴列百折松檜蒼深叢不知芒屨溼但  
覺雲氣濛少焉坐龍口樹裏湖光通直上肆遐眺劃然嘯長  
空

精廬倚峭壁選勝扼全勢中有洗鉢僧曾否毒龍制池右聳  
孤厓鸚鵡儼下睇何來萬斛珠瀉作瀑布曳雨後愈犇騰終  
古乃溶澗遙指一點青出沒波濤厲俯仰愜奇觀眾象羅巨

細緬彼玉局翁摩厓字深契而我媿塵襟來游感曠世

潘一心

字拾珊山陰諸生著忍樓詩鈔

任之專序畧拾珊少負不羈之才長聆過庭之訓爲詩吐棄一切故所存無多

婁慕曾曰外舅潘公刺史石舟先生哲嗣也性靈敏於諸子百家言無不深入其奧尤工於詩

題孫雲壑聽鶯圖

一株兩株李花簇一條兩條楊柳綠一鶯飛來似求友一鶯  
高坐若相矚輕煙暖日春風和特試圓吭出幽谷一人脫帽  
著輕衫短髮飄蕭形不俗爲愛春鶯嚶嚶聲來就此閒娛耳  
目一聲兩聲喚蠶生三聲四聲嘒堪熟斗酒雙柑舊有人得  
君韻事今堪續笑彼朱門富貴家雜沓笙歌論竹肉安得清  
泉洗兩耳著我圖中願亦足

姚

偁

字椿林諸暨諸生著寧香吟館遺稿

葉元紹序畧檣林詩溫潤纈  
密無獷悍之氣駢儷文尤工

西陵股堰廟行

錢塘之水何漫瀰乘風直欲搖坤維撼向西陵恣掀簸村氓  
十載九苦饑有元至正某月時議築大堰爲撐持須臾畚鍤  
千夫馳里正楊某實所司可奈下有宮馮夷窟宅鼉鼉盤蛟  
螭揚鬻鼓浪浪花飛千尋板築應手敲達官峩峩揚旌麾近  
前督視張其威爾不努力更咎誰可憐日夕加鞭笞家私蕩  
析手足疲歸謀諸婦聲淒其涔涔涕下如綆縻婦乃慷慨前  
致辭物能爲厲物有知抽刀闖向江之湄堂堂誓語神明期  
手割股肉旨且肥擲入江水紅淋漓喂汝一飽汝其思南溟  
北渤任遷移不然甘以身殉之將坭乃尻褌乃皮百怪聞之  
徙勿遲引曹退縮鱗之而不敢噓氣噴雲霓頃刻兩岸清漣

漪江流一片平玻璃是堰始得鞏厥基有功於民廟祀宜五  
百年後寢衰微我

朝碩輔

帝載熙八駟奕奕來南畿徵錄文獻常恐遺忽聞此事嗟神  
奇濡染大筆奏稿揮焚香九拜陳丹墀曹娥入水負父屍以  
彼方此其庶幾何論周處刀陸離錢王弩與溫嶠犀

帝曰俞哉屢領頤天章寵錫生光輝穹碑百尺高崔巍煌煌  
大典千秋垂神來神往靜以綏江妃河伯紛追隨受諸報享  
聽祝釐歲蕤卓立雙雲旗太平士女雜笑嬉豚蹏一隻酒一  
卮稽首翼神神勿嗤年年清晏佐明治

松鼠

空山少人跡森然竹柏交蒼鼠爾何來據之爲安巢當我讀

書處日夕恣喧呶我思鼠族夥蕃衍如椒聊在倉與在廁厥  
性均貪饕爾鼠獨胡爲託迹青松梢毋乃出乎類自矜名節  
高山果秋晚熟籬筍春初苞甘瓜既有實黃菊亦有苗忽然  
遭爾尾決齧兼爬搔賊甚范園竊敗過梁亭焦恣爾一朝飽  
在人終歲勞按以張湯律爾首不容梟拒捕挺走險習慣東  
西跳身如慶忌捷足善飛廉逃飛馳登木杪瞬息緣崖劫偷  
眼伺人去爾膽愈益驕剝蝕仍肆虐啣啾復呼曹豈無就擒  
者繫頸扼其尻野性恐難馴防守須堅牢誰知早帖伏乞憐  
尾先搖公然享美俸不顧嵇康嘲更邀主人寵翻爲爾辟貓  
桀黠而狡媚詭術隨所操何止憑社徒竊據免熏燒乃知鼠  
輩中畢竟無雄豪

砧聲

無限深闡意能傳是此聲愁心亦如擣秋思滿江城嗚咽自  
流水關山方用兵寒衣裁未就誰與寄長征

懷三友詩

世風日趨下薄俗久未醇翬翬雲軒子咳唾皆天真不自立

崖塹和光同其塵挺茲不拔操邈矣古之人

虞成九

君貧酷類我材器殊超特藜藿或不供充然有玉色抵掌旁

無人百夫可揮斥匡坐歌王風淵淵出金石

程理堂

葉生嵇阮流性不受羈束當其下筆時風霆恣鞭叱狂態固

瀟灑古誼亦敦篤時俗勿相輕公等徒碌碌

葉蕃生

朱金卿

字夏霖號礪齋餘姚諸生

黃炳堙日君幼嗜學素慕二程子范文正之行日夜研  
究小學人譜近思錄等書弱冠補博士弟子家益窘而  
慕道之志益堅篤好周易著讀易管窺一書七易稿而  
後成嘗曰四十以前亦隨諸儒之說爲浮沈至五十後

兩浙隨軒續錄

卷十九

朱金卿何巨

畫

八十一



始覺豁然有心得生平品行端方爲鄉黨所欽重嘗修宗譜以春秋例爲褒貶族人服其公正教人善於政發門下多所成就

述志

莫把吾身作浪浮師程學范立前修誓心天地無他志不入賢關死不休

何

旦

字賜谷餘姚人著借陰書屋詩草

擬古

涼颿起西北落葉紛庭隈佳人坐遙夜攬衣起徘徊仰視明月光照我妝鏡臺顧影相爾汝三歎有餘哀朱顏能幾何良時不再來

秋夜獨坐

閉門羣動息兀坐夜窗幽犬吠一籬月笛聲何處樓空庭初

落葉詩思總悲秋太息流光易應增遲暮愁

唐聖贊

字雲劬上虞歲貢官台州府訓導著巵山游草

鄭煦曰先生授徒數十年表率嚴整啟迪殷勤餘雖兩邑士被澤尤深多有名者今無此師範矣梁木可懷也

秋夜

不寐整襟坐窺窗憶斗牛何當疏雨過宛似故鄉秋江海誰青鬢功名擲黑頭依人非壯志王粲笑登樓

岳忠武墓

金牌十二下深宮痛飲黃龍望遂空臨亂君臣難可喻傷心兒女竟同忠熊江祠尙存南渡鴉嶺松猶怨北風和戰是非憑眾口十年前已殺陳東

懷王南澗

濱

揮霍黃金意氣尊擁書自富硯田存家傳義獻無雙帖人在

蘭芎又一邨

自號又邨

史漢文章時下酒湖山風月總銷魂年來

馳馬蘇臺畔物色重應到願園

### 義帝墓

落日荒邨自牧羊漢高奉命入咸陽一抔黃土柳江外猶藉空名殺項王

### 寶泉寺

勝蹟何人記大唐金繩寶筏現空王四圍濃翠關荆畫幾曲澄波韋杜莊剖竹引流遙注釜摘花爲釀滿攜筐尋碑幸有千年寺纖月初生薜荔牆

陳承然

字敬可新昌人著南唐詩集十二卷

恩貢

潘希洽撰傳畧先生貌古神清溫厚而多文質直而好義刺東西多英俊士半出門下嘗入剡中問沃洲所居里雖販夫牧豎無不知者

題諸暨磨心潭顧氏三烈遺蹟

鼇翻地軸東南缺霹靂一聲山石裂磨心潭上葦蕭蕭月黑  
燐青人影絕曾是綱常欲墮時杜鵑夜夜紅啼血天留正氣

與裙釵慷慨潭心齊秉節君不見犬之年蛇之月顧家有婦

稱三烈順治丙戌四月晦顧英奇妻石氏其弟未婚妻姚氏與鄰婢蔡氏被賊擊脅皆投磨心潭死石年

十八苦茹荼姚年十四哀拘玦時石年十八更有青衣蔡氏

姝蔡爲顧張氏守家婢清操一樣厲冰雪當時江上盡黃巾介馬馱馱

恥汗巖一死甘爲魚腹魂妾心方寸堅如鐵自來江水注清

潭江岸飛濤恣衝鬻忽驚陵阜起潭心潭當水之衝自顧婦投潭死後江水忽東

徙而潭中突起大阜此靈迹也靈迹分明非浪說記我清風嶺上行血痕灑

石字磨滅登臨復與弔娥碑巾幗能賢心頓折爲弔貞魂訪

此潭磨心不見波光澈祇有幽蘭滿地香一天皓月爭芳潔

會稽徽命鐘歌

五馬南來飛渡江江風吹浪龍回翔會稽有鐘井底出靈符

應在琅琊王晉書元帝為琅琊王時使郭璞筮之璞曰會稽

縣人果於井中得一鐘以告成功應於井中得之及帝即位刻

者之作必有靈符塞天人之心與神物合契耳此鐘不作蒲

牢吼井泥剝蝕如緘藏臣璞筮之占瑞應筮得豫果然刻縣

流奇光鐘長七寸二分口徑四寸五分上有鑄其上者十八

字徽命五字辨微茫口徑四寸五分數鐘身七寸二分長斑

爛古色周秦上謂告成功晉祚昌如此神物當時重商彝夏

鼎同銷亡區區一鐘亦何有使我懷古情悲傷嗚呼遠琴與

邕笛音沈響絕酣風霜柯亭竹椽剡溪棹古蹟至今皆蒼涼

何況徽命鐘為晉時物可憐典午山川空夕陽

施 彬 字挹之黃巖廩生著適亭稿

定香亭筆談黃巖施彬經史皆能背誦余嘗試以列  
代臨雍攷於廿一史中舉行典禮徵引極爲詳贍  
濼洲筆談彬家貧力學善誦詩賦十三經文選皆能背  
誦阮文達闢詰經精舍集兩浙講學之士九十一人肄  
業其中彬與焉及著經籍藝詩以爾雅屬彬又分編上  
聲十九帖以下十一卷文達重之書日知軒以顏其居

錢忠懿王銅塔歌

唐昭之際失其鹿羣雄睚眦相馳逐斗中王氣挺異人入都  
健卒雄天目誅劉滅董威武揚龍蟠虎踞國錢塘金券玉冊  
毬馬煥終始五代几四王武穆裔孫曰忠懿光纘舊物逾才  
智爰鳩巧匠鎔餅金鍛鍊幾年成國器塔數八萬有四千塔  
高約堪八寸誌其重二十五兩奇其文懸鉞十九字內鑄以  
銅外金塗辟支古佛坐跏趺年鑄乙卯昭款識輝煌蕉葉燦  
火珠憶昔雄據十三州厥金三品原坐收不惜黃金廣布施  
青白氣竭寶光流精光黯黯輝舍利文章片片揜琳瑯吳越

之劍古稱絕此塔奇巧良應侔我聞泗鼎在昔沒深淵又聞  
雷公腰劍躍重泉神物由來造化忌六丁暗掣知難全試檢  
當時八萬數至今一二還流傳寄語珍藏應什襲虹光夜夜  
星斗邊

賈應鴻

字志飛號貂山浦江歲貢  
著柘軒樂餘稿錦香樓稿

朱輿佛跋略君瞻大心雄別出町畦避熟求生避輟求  
硬避陳求新莽莽蒼蒼恍如奔馬不可羈勒洵所謂性  
僻耽佳句者

養生

量腹節所受養生乃真訣少年人不知此理吾能說風火騰  
轉身賴有氣與血氣血藉食養食化氣血活丹田煥融融黃  
庭健消豁自然生精神奚翅強筋骨嗟嗟口腹人遇食輒貪  
餐不患漲膨脗但愁塹空缺因之氣血滯那能疏以達譬若

鑪中火灰重燄不發又似倉中儲積陳腐且結食古尙宜化  
何況膩肥膾彼哉乳蒸豚餅餌十字裂糖蟹付人議牛心快  
一割味必江瑤鮮羹每馳蹏設甘脆與肥膿腐腸葉屢咽若  
輩競豪侈徒自速歿折卽如脫粟飯尋常雞魚鼈適可便宜  
止願毋恣餽啜常爲雞之廉所以鳩不噎中宮漸調和外體  
自豐悅山樵近日來頗知謹齒舌怯硬但求熟畏寒但求熱  
旣飽無貪心可口亦知節惟酒性所嗜勉強戒流歎獨臥餘  
十年覆首被必揭敬佩三老言養此身體髮古稀儻可期平  
安至耄耋

自遣

借問何人得自由雲屏山下錦香樓虛心肯下低頭拜傲骨  
難教仰面求羽鍛不飛支遁鶴機忘還狎海翁鷗老樵識字



芒鞋健差似當年馬少游

讀陳雪樵詩稿近聞失明作長篇慰之

天公吝惜讀書福堅扃金薤鎖元秘書生眼光流電如發洩  
天機觸天忌君不見左氏浮誇傳春秋國語未撰盲雙眸又  
不見卜子言詩聖心許投老西河兩目瞽嗚呼人生識字憂  
患始雕肝鏤腎語空綺杜欽嗜學亦偏盲師曠審音終失視  
何如性名蠹記聊且休山歌野曲隨口謳勿將白眼向流輩  
不妨瞪目眠糟邱先生詩才運天巧擬開囊鑰竊大道手攬  
蛟龍弄角牙更舉鯨鵬噉一飽造化那不愁鑄鑿古聖亦恐  
被咀齧光偷燒閃懾萬怪色奪施嬖狎天妓羣靈偵伺走大  
羅上訴百犯庸不科帝不獲已示薄罰奪還身鏡填銀河昔  
聞君病偏其背曷論懲譴正不頗斯時便當自懺悔胡爲乎

驚人騁臆仍吟哦雖然書生生涯祇此一枝筆筆尖舞弄性  
靈出句裁花骨色天天字織龍梭思乙乙朝作百賦風雨愁  
暮作千詩鬼神慄區區目無見方寸皎如日但教此心尚有  
一息存管他六丁巡警電按室我爲斯言亦掉罄爲君讀之  
君且聽形骸可外君本達雖已失明如墮甑況無世事礙眼  
睛心終不盲從遣興惟有一事我舛望近作樂餘詩稿孰能  
爲我更刪定

負暄歌

君不見鳴珂蹋鼓朝明光朔颿漂漂鞞滿霜又不見江湖載  
寶作賈客客舟風雪凍欲僵冰天富貴亦苦惱那識天有黃  
絲襖四海九州大被無不到趙衰千古人傾倒我今無事坐  
前軒手握書卷朝負暄始知宋父獻君語出於至誠非譎言

讀論衡

我昔聞論衡中郎枕中祕王朗欣得之戒勿洩珍闕急欲見其書千金敢吝費一緘借而得獲寶喜不寐危坐展其卷縱橫而恣肆讀逾什一二攢眉不愜意無乃爲佞乎而非理之至展之未終卷輒欲委諸地

古人著一書多本性情出能令讀者心勸懲得其實天或示災殃人或遭讒嫉反躬敬自修庶幾凶化吉彼乃謂適然非關疏與密天變不足畏人言不足恤作俑新法新破敗律身律遺禍誤蒼生何苦費紙筆

彎弓射堯日鍊石補媧天寓言屬諸子何妨姑妄傳一一恣辯難絮絮言百千縱云辭而闕拘墟甯獨賢何況欲問孔兼著刺孟篇吹索及昔聖自謂得真詮徒見其妄耳直可投諸

淵後儒刺刺孟亦復費丹鉛

勉強讀一過於心終不愜煌煌八十篇古書恣漁獵談言或  
微中繆唱偶一協一闕市中衡但可平喋喋至稱聖賢書弔  
詭難妥帖魏晉尙清言頗不拘禮法假以作談助便給似敏  
捷祇竟泮林鶡何如漆園蝶

旌功祠弔于忠肅

祇爭社稷不論功膽識無雙貫日忠迓得龍髯歸故國拌將  
鷗血灑秋風奪門事往精靈在斷碣文殘蔓草空兩字獄成  
千古恨九京心迹岳王同

二蟲

獨坐夜已午書卷懶不披丹鳥入我室星點燦離離暗中白  
鳥喧邂逅相嘲嗤矜言鬼母化佛語匪虛詞名余曰黍民字

余豹腳兒飢嘍孝子血餒噬貞女肌青宵聚成市歌謠以遊  
嬉爾質乃腐草集此將何爲丹鳥啞然笑曰爾言何癡我秉  
大火精資生良獨奇光明有本性恥爲暮夜移丹心皎不滅  
斗室闇無欺照獄駱丞賦點衣工部詩豈若爾曖昧將隨蚤  
蝨糜

賈應程

字章式一字將錫浦江諸生著雲村集唐詩

古先生墓

集唐

古墓樵人識

劉長卿

無勞問姓名

李巖

乃知真隱者

李洞

自號

古先生

古先生

樹密風常在

劉昭禹

谷寒雲不行

李白

披榛訪遊

迹

白居易

我亦淡忘情

杜甫

鄭宗善

字樂於號吉軒江山廩貢著聞吉軒詩草

鄭增康傳畧吉軒秉性和厚植品端方所作詩或

抒寫性靈或感懷時事莫不跌宕悽婉如聞笙簫

舟行書所見

澱江早發暮蘭溪風向東來水向西幾個牧童閒跨犢數間  
村舍正啼雞春波嫩綠平高岸老樹垂青臥古堤日落推蓬  
閒眺望老懷真與白雲齊

吳丹萼

字秋嚴號小  
山涑安廩生

縣志丹萼性至孝幼隨父讀於外服事甚謹人以黃香  
目之長侍疾躬親湯藥衣不解帶父歿日夜哀號孝事  
老母有姊適遂安嚴氏母憐其貧併其子留養於家冠  
婚諸事皆身任焉幼弟鼎鈞母愛之循循教誨稍有所  
得則稱於母前以悅親志課徒以謹言慎行爲本著有  
館訓要言督學李國杞給額日允敦至行兩學師以全  
孝請

旌建坊

七里灘

雙塔明秋浦孤帆度夕灘碧苔黏石溼黃葉打窗寒客子情  
何極先生去不還畫眉聲裏過懷古淚闌干

兩浙輿地續錄

卷十九

吳丹萼 陳遇春 張大鏞

全

陳遇春

號鏡帆永嘉廩貢著雁山遊草

縣志遇春敦孝友劬書樂善孜孜如不及嘗督修東山書院新雙忠祠建本支宗祠修歷代祖墓歲饑減田租施棺掩骼以爲常永邑距省垣千里寒峻艱資斧輒裹足遇春自嘉慶壬戌倡議集捐賓興旅費二千餘緡權子母以飲助之名曰文成會歷署學篆奉檄所至輒倡義舉罄清俸每集一事必爲一文以紀之其建半塘亭記謂余非敢爲益於人亦非悅於人也蓋生平踐履篤實有功文教類如此能爲古文辭尤留意鄉邦文獻所輯有歐括文錄華蓋山志畧護國寺誌異詩郵籤偕和集其所自著有文成紀事梧竹山房文稿

安禪谷

山舍不盡青雲藏不盡白谷深宜安禪不到聲聞客我朝入雲中衣與溪光碧老僧倚枯藤泉響冷石壁十年不下山落葉無塵跡忘言坐窅然世外心何極

張大鏞

字廣聞號硯丁永嘉廩生著硯丁存稿

東甌軼事隨筆硯丁先生高才博學讀書目數行下家貧無力購書每於藏書家借觀所夕攻苦不劬爲文亦

沈博  
絕麗

陳氏雲山樓晤周君懋時

百尺峇峩地三年故舊情人如梅影瘦詩比竹聲清陳榻逢  
君下周醪向我傾孤舟明日別別恨又重生

陳

棠

字芾園麗水人  
著芾園吟稿

陳遇春序畧芾園上舍樂善好義嘗與修  
文廟建蒼頡祠詩不雕琢古樸如其人

游石門洞

青田有石門幽邃多逸趣松柏互青蒼奇峯密迴護曲澗架  
小橋巖端飛瀑布盤旋恣遨遊不覺日已暮



兩浙輶軒續錄

卷十九

陳棠

全

小  
八  
、

兩浙輶軒續錄卷十九